

四明談助目錄

第十一本南城五

卷二十三

雲石正明嶺豚附 記廣福寺起東行轉南至竹湖古蹟提綱

廣福寺述 成化志 威果指揮營 顧漕使宅述 郡邑志

鄞縣學錄 郡邑志 古跡敬一亭 尊經閣聖像述 敬止錄

錄 歷朝賢學師宋杜醇 樓郁 元方炯元 明謝澗

王奎 張鵬 張廷實諸傳又附 逸事秀才罰對 花提

舉調學官 燭光占瑞 兩貢士果報諸記

高中丞第述 聞志并 族望表附 新按列 武舉武 贈公士

知府萃 光祿翹 中丞斗樞傳并 傳後論 逸事 中

四明談助

卷二十三

目一

丞詩二首 襍記二則又 文學斗權傳并 壽序又 文學斗

魁 隱君斗開 武部宇泰傳并 勾餘土音詩又 公子奕

宣 奕學傳并 同族科名

仇少宰第錄 制使愈 贈公遵道 少宰兆鰲諸傳

王尚書第述 嘉靖志并 湖語附 新按 汲古堂錄 句餘土音

詩并 族望表列 武經安道 直秘閣摺 尚書應麟并 書

目 逸事 畫像記 太常應鳳 居士世昌 遂初老

人厚孫 隱君寧孫 處士節諸傳并 湖語

又王氏述 族望表錄 教授文貫 進士宗道傳

郭氏述 指揮故册列 侍御振培 孝廉永麟傳暨 同族科貢

文學傳心連傳

陶氏錄 同知泓傳并 同族科名錄 布政鑄傳

馮氏廢祠附 新按 白鶴廟述 錢志附 何氏科名

李中丞第述 聞志附 新按列 太保澣 錦衣文經 文學文

緝 公子允睿諸傳并 朱節母保孤事

戴中丞第附 新按 丁中丞第列 中丞繼嗣監軍泰清傳

普照院述 敬止錄 雲在樓陳氏錄 知縣言 御史朝輔

公子自舜并 生母沈氏傳附 句餘土音賦陳氏古蹟詩

南湖林氏述 族望表附 新按 又南湖林氏述 族望表錄 評

事時躍傳并 高隱學題遺集後錄 都御史時對傳并 傳後

記 傷今五咏詩 句餘土音詠評事太常詩

又林氏錄 侍御可成傳 後宅基售于洪氏附 洪氏別業記

四明談助 卷二十三 目二

胡處士居錄 處士奇標 司訓耀庚傳

竹湖述 湖語附 新按 林氏近性樓附 新按錄 學士奎照記

卷二十四

雲石渡河脈附 記廣濟橋起西北行至南湖頭古跡提綱

高氏舊宅附 新按 黃氏世家述 前後族望表錄 侍御龜年

傳 句餘土音馬秦山操又 侍郎宗明 知縣宗欽 僉

事元恭 鴻臚元肅 同知靜存 知縣道宏 處士道

暉 文學道南 知縣于高 處士之傳 文學之綺諸

傳

黃僉憲第中舊河述 敬止錄別錄 黃氏又 沈相國第改提署

述 聞志

提督公署述 浙江通志曹志附 田子慘死記錄 賢帥吳陞蒼

保二傳

萬總兵衙述 聞志附 新按錄 萬氏家乘序列 僉事邦孚傳并

傳後記 戶部泰傳并 詩文集跋 戶部八子傳并 傳後

論 貞文著述書目 學使經傳

董給事宅述 族望表附 新按採 董氏譜論董孝子墓攷錄 義

士之邵 進士恭禮 殉難給事志寧傳并 給事傳後論

句餘土音詩

游仙廟表 碑記 紫薇街附 新按 三鳳坊錄 范氏科名

紫薇坊余氏述 族望表錄 布政麟 布政洵 學博杲傳

菜園廟 童元戎第 李侍郎遷居第俱附 新按

四明談助

卷二十四

目三

曾家滙述 寶慶志敬止錄 南湖頭述 寶慶志附 新按

卷二十五

錫山脉至南湖附 記龍舌尖起北行至大界河古跡提綱

龍舌尖述 湖語附 新按 紡絲巷 磚橋廟附 新按述 錢志

紡經局採 鮎埼亭集文又 七古詩湖語 南湖余氏附 新按

壽昌寺述 聞志錄 住持行恢悟留二傳附 殿後古槎記并詩

東隱堂古柏 羅漢畫述 錢志 香定菴附 新按

天封橋朱氏採 朱氏譜錄 善行源 文學墀 徵君金誥

孝子世燧諸傳附 天柱山房記并 記朱氏別業歸董氏

狀元坊述 寶慶志 祥符廟述 寶慶志 白華菴附 新按

新寺大街附 新按 古藥師院 元帝師殿俱述 敬止錄

府城隍廟述 寶慶志聞志附 錢公降神記

宗室趙氏述 族望表錄 觀文善湘傳并記 趙氏賢達諸公

邵提學第附 新按 握蘭坊述 聞志 皇親宮採 寶慶志圖

新寺後巷附 新按 華檢討宅述 族望表錄 孝子昭處士明

義殉節檢討夏烈婦陸氏諸傳附 勾餘土音詩二首

漁欄橋述 敬止錄 古墓誌石并 王伯厚紀事詩述 聞志

重桂坊孫氏述 族望表附 新按錄 徵士枝 太常起予

山長元蒙傳附 句餘土音詩

項觀察第附 新按錄 觀察良梓傳 重桂坊述 寶慶志

新街崇讓里述 全謝山記

全侍郎第述 全氏宗譜表 贈公伍瑜 學博良政 少司空

四明談助 卷二十五 目四

元立 宗人少愚 都事少成 同知少微 詹事天叙

知縣天授 舍人大訓 徵士大和 贈公美騏名位附

句餘土音詠古蹟詩四首

萬都督府錄 指揮全 都督表 參將達甫諸傳

新街徐氏附 新按錄 御史金星 太常應奎 監軍美節傳

大梁街附 新按 萬壽寺述 聞志錄 住僧清濬傳

單徵士第述 閒中今古錄敬止錄 李侍郎第附 新按

縣城隍廟述 寶慶志錢志

郁家巷述 永樂志 司戶廳述 寶慶志

司巷徐氏錄 戶部家麟 御史劾 學博本禮孫 受荃連傳

左提學第附 新按錄 教諭臣黃傳并 逸事又 提學峴傳

郁家廟述 聞志附 新按

小梁街附 新按 司法廳監倉廳製幹廳牢城營俱述 寶慶

志

柴家廟巷謝氏述 鄞獻表族望表附 新按列 按察瑾 至行

矩弟員 按察汝儀諸傳并 逸事

徐御史第附 新按錄 御史待 御史殿臣 知府懋昭傳

開明菴述 聞志 開明山述 曹志附 新按

四明談助卷二十三

雲石之脉自南而西諸蹟已錄於上茲再錄自北而東為廣福寺為宋威果指揮營為宋願漕使宅為鄞縣學為明高中丞第後為仇少宰第為汲古堂王氏舊家郭氏陶氏為馮氏廢祠誤稱忠勤祠為白鶴廟為明李中丞第丁中丞第戴中丞第為廢普照院為雲在樓陳氏南湖林氏為竹湖自鎮明嶺歷旌忠廟後繞過東至廣福寺前坡阜不斷為縣學來脉自新橋普照橋轉西至竹湖沿河有高低坡阜為縣學下沙水落竹湖出蔣園廟河所有事物詩歌詳于後

廣福禪寺

在縣治西南握蘭橋西漢乾祐二年建號羅漢院宋太平興

四明談助

卷二十三

國八年賜今額志成化

威果指揮營

在行春坊東宋嘉定十三年以其廢址為縣學寶慶志

顧漕使宅

故寶雲寺在均奢橋東者乃顧漕使宅湖語注顧漕使名承徽

宋開寶中捨宅為寺聞志佛部明宏治中以學舍迫隘徙寶雲

寺於竹湖坊戒香寺廢址以其基移建明倫堂創尊經閣聞志

學校部

鄞縣學

鄞在漢為鄞屬會稽郡唐屬明州縣附郭在開明橋建夫子廟於縣東五代改鄞為鄞宋始立學王文公安石宰縣因廟



爲學在縣東半里請杜先生醇爲師以教養弟子建炎燬於兵嘉定十三年丞相史彌遠以舊址湫隘命守僉建以寶雲寺西威果指揮廢營更之於是先聖始有殿從祀分列春秋釋奠禮行扁其堂曰養正東西設四齋曰觀善曰辨志曰習說曰敬業後屢圯屢修明洪武初損四齋存二更養正堂爲明倫堂正統三年守鄭珞徙建明倫堂於殿西左右列齋殿之東建文昌祠祠之東北爲射圃成化初守張瓚割寶雲寺西隙地以廣之宏治中御史金洪言於提學趙寬徙寶雲寺於戒香尼寺廢址以其基移建明倫堂創尊經閣嘉靖九年遵制易塑像以木主建啓聖祠於明倫堂東又浚學門外硯池立峯塔二十年守沈愷建聚奎亭於儀門右

節錄郡志

歷朝

四明談助

卷二十三

二

碑記詳敬止錄師儒之制與郡學同已見前卷

明尊經閣敬一亭

嘉靖間欽頒御注敬一箴及視聽言動四箴註勒碑貯其下因改名敬一亭郡學宮同文俱載敬止錄

尊經閣中奉聖像

楊冢宰守阯尊經閣記云先是文廟聖像坐隅復有石像一軀相傳以爲甬東書院所遺史文靖公刻於序拜亭者轉徙湮沒久矣因浚泮池得之以寘於此予子茂深適見之以爲塑像之隅復置石像不幾於侮聖瀆神乎因捐金以請於學官爲之藻飾几座今奉安於尊經閣中并記之 按續文獻通考云孔子石像程端禮端學講堂所立後人掘土得之乃

遷奉之鄞學其說不同敬止錄

歷朝賢學師

宋鄞縣學師杜醇

慈溪人經明行脩學者以爲模楷慶歷中鄞始建學邑令王安石請爲之師又作師說以勉之邑中文學之盛自公

始曹志

王荆公請杜先生入縣學二書見郡邑志

宋鄞縣學師樓郁

本邑人字子文慶歷中以文學行誼延致爲師掌教郡縣庠詳見十九卷西湖樓氏本傳

元鄞學教諭方炯元

四明談助

卷二十三

三

寧海人嘗任鄞學教諭其子曰克勤號愚菴生子二長曰孝聞其幼曰孝儒卽正學先生也見宋潛溪墓版文聞志

明鄞學教諭謝洞 王奎 訓導張鵬俱詳郡邑志

明鄞學教諭張廷賓

字客卿餘姚人天啓甲子舉人爲縣學教諭形貌清癯性甘淡泊時江南尚溺於承平公獨愾然謂數十年來人心喪失遂爲世道之禍今人人宜先復其本心然後可以挽回世道因作復人心說一篇榜之明倫堂一時笑以爲迂已而其言大驗遷爲楚令未之官卽慨然棄去入四明雪竇山中爲沙門結跏於妙峯之上年八十餘卒李志

秀才闖府道罰對

一秀士失館無聊閒走偶闖府道吏拘見府因詰其故士以實告府出一對令對如佳卽釋且薦一館曰徧地是先生足見斯文之盛士應聲云沿街尋弟子方知吾道之窮府佳其對果薦之一館適有袁元峯煒亦失館蹈其轍闖入府道府亦出一對曰湖山倒影魚遊松頂鶴棲波元峯卽對云日月循環兔走天邊烏入地府亦薦之

荳棚話

花提舉調鄞學官

浙江花提舉舊與鄞縣學官顏某交往後花陞僉事提舉至鄞以舊交戲出對云鷄卵與鴨卵同窠雞卵先生鴨卵先生顏應聲曰馬兒與驢兒並走馬兒提舉驢兒提舉

小品

四明談助

卷二十三

四

燭光占瑞

萬歷二十五年鄞學春祭兩燭之光聚而爲一是年秋張應完發解

曹志

張應完見槎湖張氏下

兩貢士果報

鄞庠生王錄臨貢其次爲李循模李素乏行多智術乃攘得之王不較也李入京就選夤緣入嚴相之門求順天府學司訓嚴爲諭意銓曹許之于是未掛榜前卽縱步入順天府學登其堂窺其衙齋夫輩異其舉止訶之遂大聲詈曰吾不數日當坐于此鼠輩敢無狀耶齋夫輩乃羣譁於吏部前語聞文選大駭亟易以廣西一小學李怏怏去未幾死于任明年王入京需次乃得江西餘干縣學訓導頗

致饒裕

見聞
紀訓

高中丞第

在縣治南新橋都御史高斗樞所居志聞其舊宅在廣濟橋并章耆巷李學博之居亦其舊第今中丞以前諸傳總列于是以便彙觀

甬上族望表萬竹高氏太尉瓊之後也萬竹先生爲一望其子孫見後表後表云都御史斗樞諸生斗權兄弟兵部員外宇泰三望

高萬竹先生傳見蔣山舊居下薛千仞鄞獻表稱高塘高氏在南宋時有進士九人

武舉高公武

四明談助

卷二十三

五

號梅孤負奇好讀書凡天文律呂兵法騎射無不嫻習嘉靖時中武舉北上因歷覽塞垣以策干當路不用遂棄歸所言乾象無不驗晚乃專精于醫治人無不立起嘗慨近時針灸多誤手鑄銅人三男婦童子各一以試其穴驗之人身不爽毫髮所著射學指南律呂辨痘疹正宗針灸聚英等書行世志曹

高志齋先生士

字克學號志齋少孤好學事伯兄以禮兄弗愛也後伯兄爲吏坐贓盡以己產代償坐是家益貧爲學益力勇于赴義郡有不能葬父者其出繼之弟富方爲其爲後父營葬先生卽命其兄就葬其父弟乃賄豪貴人訟之官先生直

前責之曰公爲卿大夫不能正身率物而反爲不孝子助乎及之官直曰世有爲人後子而發本生父之骸者乎官不能奪晚年精于醫有奇驗嘗訓詁靈樞經以子萃貴贈

刑部郎中

聞志

知府高公萃

字升伯號南麓萬歷二年進士歷官刑部郎中出知肇慶府興利惠民置田贍士肇人肖像事之會與監司忤遂解組歸以名德爲里中模楷家學世傳大中丞斗樞其長孫也

詳者舊傳

高光祿翹

號玉陽知府萃之子授光祿署丞善承家學培德基以子

四明談助

卷二十三

六

斗樞貴封如其官年躋上壽子孫繁衍

聞志

大中丞高公斗樞

字象先號元若宋衛國武烈王瓊之後本蒙城人五世孫修職郎世埴從南渡始家于鄞遂世爲鄞右族曾祖士贈刑部郎中祖萃爲刑部郎屢定大獄神廟嘗稱爲老法司父翹光祿寺署丞能傳其家學公生而體性端重少有異稟讀書數行下大父南麓公異之嘗曰觀此兒風儀他日名位當遠出吾上年十九舉于鄉中崇禎元年戊辰科進士己巳授刑部廣西司主事未踰月京師戒嚴公奏記刑部尚書喬公允升謂獄中多大盜恐乘亂爲奸請假京營兵數十以衛意外喬公不以爲慮數日盜百餘人破獄垣

而出喬公竟坐繫論罪公以此名重次年公出知湖廣荊州府方是時江北大賊亂晉豫間已五年癸酉爲崇禎之六年賊始渡河入楚荊州承平久不設一卒公急籍民兵待用庫中藏舊銃百餘公使列諸城上先發藥試之多震遠近次日諜者言賊哨騎至四十里外聞郡中爆聲甚厲賊驚遂從遠安界上馳去甲戌春賊復自襄鄖而下南爲荊州東爲承天撫軍唐公暉移算兵數千護承天陵道由荊州公謂荊有重兵賊斷不敢東指遂留屯境上賊果西入蜀算兵襲擊敗之初唐公聞公擅留所發兵大怒及捷聞更喜丙子遷分廵道湖廣按察司副使楚地在江北者俱被賊熏燎湖南諸郡尚得無事而土賊蠡起公盡力禦

之所殺傷數多始敗去尋復擊殺亂賊劉高峯等撫定餘衆詔錄其功進右叅政十四年辛巳賊張獻忠自蜀復奔楚督師楊公嗣昌迎戰兵大潰乃直趨破襄陽取其家以去襄王遇害事聞上大怒爲逮撫院袁公併奪鄖陽守道官而遷公荊南管襄鄖二府鄖所治外六縣俱爲賊破惟郡城僅全大不滿六里居民可四千城外蓬蒿數百里村落蕩然公至無從得米蔬士民對公痛哭公勞恤再三時鄖守兵約三千公乃于城外相地形東倚山南倚漢水繕爲二樓分兵守之招集降丁拔其才可用者署爲將如王光泰苗時化數人後俱得其死力鄖遂有練兵五千初李自成張獻忠諸大賊每陷一城橫搜其財卽棄去壬午秋

李自成羅汝才所得中州數郡始分賊置守而二賊自將由汝寧趨鄖襄左良玉在樊城先走賊遂陷襄陽十二月分遣賊將攻鄖城公率諸將與大戰三日夜賊敗去是月荊州亦陷賊于楚已據襄陽荊州承天德安于中原則有開封河南汝寧南陽諸郡自成漸有逆謀獻賊亦畏自成強避之黃州不敢復與合于是自成始得專制數十萬賊橫行圖取秦中僭號而置其家于襄陽以鄖與襄接在必得復遣其驍賊劉宗閔將三萬人攻鄖賊勢甚厲初以靜樂宮門百餘聯爲木城復用木梯六十並薄城下公使人用火礮擊之火起賊走追殺賊數百盡奪其木城及梯以歸公令諸將曰賊衆過五倍若爲所誘遠追賊以騎繞我

後則城與兵不得相顧矣後與戰無出一里若戰深逾一時賊未退則聽上金鳴卽兩分疾驅以開中道使城上火礮齊發于是賊死傷甚衆賊乃乘夜造爲三十六土臺每層土敷以層麥用石壓其上累而登高與城等賊乘臺以炮擊城上凡十餘日公見其倦乃大具牛酒使士卒各飽食盡出以攻臺老弱亦荷鋤鍤以從每攻陷一臺賊下走土石輒然崩士卒益乘銳殺賊老弱爭負其麥助鼓譟聲振城上下賊大敗遂奔潰前後力攻凡四十餘日時公遣一健士請援于督師孫公傳庭孫公謂所使曰適有降卒云鄖陽殺賊已一萬今來牒只報三千何也使者曰公守道日乘城督戰見斫一賊卽紀一功諸重創歸斃者自多

不敢冒上幕府孫公稱善卽遣其將高傑來援會賊已退自成憤郢堅守益發賊來攻至龍門相去八十里頓不進諸將慮賊有所俟公笑曰此畏我也但逼于自成之命不敢歸耳乃日發兵五百使陳于楊溪山上日入而歸賊望見山上立幟益疑會夜半漢江驟漲有水石相擊聲一賊夢中大呼曰郢兵至矣俱驚起自相殺或奔或伏天明賊大慚卷甲而去嗟乎自國家久太平武備久廢所置監司守令俱書生不知兵望賊風靡所辦惟一走遂釀瓦合之衆致其勢滔天使誠禦賊有人能守能戰卽江陵虛爆聲漢江水石相擊聲亦可驅之使走吾知此賊亦不足滅也時督師孫公治兵西安將出關討賊公謂大兵出關自成

必悉衆來戰請率郢兵直趨光化穀城以擣襄陽覆其巢穴使賊內顧孫公以爲然檄其將惠登相徐勇將兵夾攻公時已分兵攻復均州保康遂與合兵而出穀城光化守賊俱以城降而督師出兵大潰于襄城郟縣之間自成遂驅入關遣賊至襄陽盡護其妻孥以北謀至穀城諸將俱失色登相遂率其衆趨投武昌公獨將郢兵前攻襄陽賊出戰苗時化王光泰奮擊大破之斬首三百賊退保城公方與諸將議而郢襄陽守吏馳書謂大賊將逼郢我兵不宜遠出公不得已乃引還甲申正月自成已盡據全秦將北犯京師以郢之攻襄復遣守襄賊路應標發衆三萬來攻郢將士久殺賊膽氣益壯然自用兵十二年野穀無種

人大饑而賊亦苦輸糧不繼因復取均州以所徵雜糧儲其中不使轉給攻者公謂諸將曰賊謂我不敢出均州必無備今輕師襲之燒其積聚亦退賊之一奇也乃發壯兵一千薄暮陰渡漢江疾趨百二十里直入其城大斫賊盡燒其儲糧而還城下賊聞之乃走相持復五十日自壬午襄陽陷後朝議復移開府于鄖所遣撫臣二人俱以路絕不得入遂謂襄鄖當併陷不復設鄖官至癸未六月而公所上請援疏得至京師始知鄖陽尚在上召大臣會議出公疏太息欲卽命公開府而大臣與公無交意不悅乃躡遷知鄖陽府徐起元爲撫院而加公太僕銜甲申二月廷議謂賊擾秦欲設重臣開府漢中興安以固蜀門戶乃遷

公贊理軍務巡撫陝西等處地方兼制川北都察院右副都御史而不知西城久非國家有矣公使乞援于撫院何公騰蛟所遣使俱持二升糒絮檄縷裂中行乞而前至七月得何公報書始知賊陷京師先帝殉社稷南京已有新主公率一軍號慟旦夕臨且得聞撫秦之命乃更募壯士間行至南京上疏謂先帝命臣撫秦臣誓以死報今鄖陽僅五千日夜爲賊攻不能分以入秦于是南京亦知鄖陽尚在盡叙諸將吏功而改公撫楚軍時公在鄖常圖復漢中乃假故秦將孫守法鄖兵一千攻復興安州公方欲赴之而秦守賊盡走追騎南下守法棄城入褒谷山中鄖陽撫院亦降公始退耕于沔州當自成敗于甲申之冬復歸

西安分賊守黃河日夜修城濠爲固守計至宏光乙酉正月自成知不能禦遂復走入楚仍留其妻孥于襄陽而率賊由荊洲渡大江取道石首渡洞庭湖口繞出武昌之南左良玉聞賊猝至大驚卽日乘舟東下惟撫院何公尚守長沙蓋左師自開封敗後畏自成失膽初不知其敗而南竄也南京聞左帥至九江藉口欲除君側初不知其避賊而走也遂舉朝倉皇以致國事大壞相提而論彼擁重兵十萬而不能當賊于旣敗之後反震傾我社稷公惟有單兵五千而能亢賊于方盛之時不失所守一寸土是則國命所繫惟在得人耳公耕于沅二年丁亥春道旣通公父玉陽公遣僕促公歸四明公匿跡里門數有家難然事亦

四明談助

卷二十三

十一

旋解庚戌以疾卒於家年七十有七公性淡泊一褐袍十餘年食無兼味故能與士卒同甘苦久而不變惟好讀書軍中亦手一編每登陴橫槊輒賦詩示羣僚有聞笛風概晚年苦目中有蜷毛反刺不能作細書猶手定其詩文十六卷名曰蠶瓮集及宦歷漫記守麋志畧藏于家杲堂文鈔行狀自流賊起討賊之師一盛于楊嗣昌再盛于孫傳庭皆竭天下之力以奉之劍客奇才輻輳戲下而襄雒之陷潼關之敗中原由此陸沉左良王之兵號數十萬自開封潰後翱翔樊城避賊于荊州再避武昌三避九江其視一戰如以肉委餓虎區區鄖陽饑卒不滿半萬重圍援闕兩京陷沒魁然而峙必待公解任而後速飛然後知兵不在強弱城

不在堅脆顧用之之人何如耳亡國之際豈翳無人君子所以痛恨於廟堂之倒置也公奉父家居而白首兵間人情所注風波震撼無日無之一對獄吏再連嗣子故浮沉閭里不敢自異晚又目盲租吏債家時見妮搨豈知其爲先朝萬里城也生平一無嗜好秃筆頑石時爲選體詩寄興亦不必以示人與人言意滿口重至于兵事則心開余之交公在己丑慷慨失職時相過從猶謂使公建大將之旗鼓必有可觀豈知其悶悶以老哉

南雷文定墓表後段

公夫人徐氏少有道心從公鄖陽歸歎曰吾在圍城中日積柴繞垣以待死幸而得免歸而國難洊至坐視其父子之難又日持尺組以待死又幸而得免吾尚何意於人世

四明談助

卷二十三

十二

遂入太白山中學佛結茅居焉法名本通字慈滿一日有老僧過其門長揖嘆曰膏以明自燒中丞不如夫人遠矣言訖遽去聞者追之問姓名不肯言亦異人也

續耆舊傳

中丞公甲申七月鄖陽始聞先帝凶問

六首錄二

聖王英畧本回天集蓼憂勤亦有年丹浦縱能驕赤羽紫宸何遽暗黃烟八屯虛擁千廬列萬堞誰抽一矢先疆場孤臣方血戰橋山望斷恨長綿
白狼河北羽書遙關洛狂氛戰更驍纔發九邊芟國寇輒逢三輔納天驕朔南蹙沸勞明主文武支吾負聖朝京邑坐傾由逆豎千秋遺恨失平遼

高中丞傳後記

結埼亭集

流賊之攻鄖陽吾鄉高公以疲兵扼之賊屢至屢挫而去
思陵用公爲陝撫南中又用公爲湖撫時大兵已下陝
公至不得前還鄖則亦內附矣時公尚有老父在堂乃間
行歸家齎志而卒方公守鄖有四卒最勇專任刼營事賊
至輒令出刼之四卒分啖生牛一隻火酒各一樽夜去竟
入賊營但操一鐵鞭所擊立碎賊以刀禦爲鞭所格或折
或墜皆不支又往來倏忽諸營爲之驚擾四卒及日而還
無傷者賊乃終夕嚴備不得休息而四卒出入自如非邏
卒所能遏其歸城也手中鞭皆牢不可開瞑坐移時旣而
張目大呼齊擲之公旣歸亦不知四卒流落何所其後有
族弟故孝廉斗階以計車北行宿酒肆中主人翁老矣問

知爲公族大不以其應試爲然斗階叩之不肯道姓名固
問則曰吾昔從公鄖陽卽所謂四卒之一也因言公事甚
悉且出鐵鞭示之嗚呼方公自鄖歸天下猶多事以四卒
之枝何難改投以圖進用而隱埋恐後觀其責斗階之言
諤諤有古人風節斯不當僅以健兒相目者矣因記其事
附之公傳後

高隱學敬止錄云先中丞天啓乙丑會試三場畢是夕夢
入朝殿闕壯麗光絢奪目醒而喜爲吉兆也已而下第次
科戊辰方舉進士臚傳日宛然舊夢因悟前科尙未有殿
因萬歷間三殿災乙丑春大工方興至丁卯浙闈試題方
是賀三殿告成表功名前定如此

高文學斗權

字辰四大中丞斗樞弟也少爲諸生有盛名後棄去中丞被逮至杭公竭力救之獄始解晚年壁立瓶罄緼袍敝屣怡如也爲人風度淡蕩發言皆有深致古文簡貴有法著有寒碧亭集續者舊傳

高文學斗魁

字旦中號鼓峯文學斗權弟國亡後屏舉業不事一門中互相師友詩文風發泉湧諸公皆爲傾倒從餘姚黃梨洲講學其弟晦木宗炎下獄幾死者數矣旦中百計出之嘗遊武林見舁棺過者血瀝于地曰是未死啓棺與以藥果甦江湖間謂高旦中能起死人求治病者延請無寧晷久之

四明談助

卷二十三

十四

喟然曰吾始有志于姚江念臺之傳旣而從事詩古文詞今乃以方技顯乎由是一意講學未幾卒著有桐齋冬青閣語溪等集姪宇泰評其詩曰鼓峯叔久遊苕霅間得其山水空清之氣深入詩脾故絕不染人陳言續者舊傳

高隱君斗開

字光先一字蒙菴都御史斗樞第四弟也高氏諸季皆晚出丙戌蒙菴以其伯兄之故終身不豫進取事而風格則有承平之遺善識古玩尤愛燒爐終日焚香靜坐及晚年家壁立而爐獨存邱惺齋贈以詩有云貧不賣爐存古格者也其詩以其後無傳僅存七言長句數首續者舊傳

高武部宇泰

字虞尊別字隱學晚年自署宮山又署蘄菴都御史斗樞之長子負才名性尤忠醇乙酉六月之役都御史尚在鄖而公輔錢忠介公起兵于鄆監國手諭獎之授兵部郎尋以奉使過里門而江上陷其時都御史入陝陝已內附還鄖鄖亦內附旁皇無之念光祿公尙在家間道來歸而海上諸公方思揮魯陽之戈以挽落日公父子輒豫之丙戌之冬蠟書自海上至謀者得之公首被捕戊子之夏華王事洩再隨都御史囚繫辛卯幾復株累勵得脫壬寅之逮尤爲震撼雖幸得保全而家已破都御史諸弟斗權斗魁皆遺民之苦節者時人并公稱爲四高公國難後公屏絕人事與里中諸老爲梓鄉耆會其豫選者甚嚴王水功林

四明談助

卷二十三

十五

荔堂徐霜臯之徒僅九人焉壬寅之在囚也終日鼓琴有仁和令者亦解人也以慮囚入聞琴聲而異之爲具酒榼共酌至漏下相與賦詩而別是後隔一日必至及公事解遣人謝之竟不往謁所著有雪交亭正氣錄十六卷愛張公肯堂翁洲所寓之亭以名其集蓋自甲申十九人以後分年爲死節諸公立傳而附詩文于末有敬止錄四十卷記甬上舊聞有禮貫一書獄中所作有肘柳集則公所作詩文諸種也

結埼亭集墓表

從弟宇厚著自牧集

續者舊傳

壬寅有海上降卒告變之逮楊職方文琮以是獄扼吭死

句餘土音擬薤露詞

變徵聲

高武部受琴

三度入牢獄最後三年淹何來瑤琴響空中聲湛湛得非
孫蘓門剛腸爲我箴逋臣陷野葛一尺尚未厭中夜起於
邑竊恐絃亦暗誰知變徵聲猶能張須髯劃然風雲開中
有殺氣含鬪扉百死囚聞之起痼疾俄聞聲漸低哀怨何
纖纖露禽亦啁啾和歌鳴前簷

詩話武選云獄中受琴于異人異人非他卽華職方也

高公子奕宣

字旬孟一字伯子武部字泰長子李觀察振璣壻也壬寅
之難武部觀察並在危急先生亦逮至武林帶鎖說經已
而釋之盡鬻其產以救父先生才思華贍下筆千言顧故
國之痛戚戚不忘頻遭摧挫竟不永其天年論者惜之所

四明談助

卷二十三

十六

著有東海集

續者
舊傳

高公子奕學

字季殖一字岸菴武部字泰少子也武部四子各承家學
能詩今罕存者岸菴僅存殘稿一卷其佳處有武部之遺

音焉

續者
舊傳

同族斗階順治戊戌進士潮州推官 字亮康熙己酉拔

貢 奕襄戊辰歲貢 斗弼壬申歲貢 奕選癸巳舉人

仇少宰第

仇少宰滄柱先生之先自宋待制愈知明州始家於鄞少宰
之祖父世居城東小沙泥街見王海樓三補耆舊傳少宰通
籍後遷於此卽高中承舊第也

明州制置使徽猷閣學士仇公忞

字泰然宋大觀進士自益都來知明州遂家於鄞

三補耆舊傳

待制有子達材名車負異稟摸碑一讀卽能背誦終身不

忘人呼之爲仇摸碑見剡源先生集中

結埼亭集外編

待制泰然

傳互見十一卷明州治下

仇贈公遵道

字公路待制泰然之裔孫大父曉湖創居城東之章谿里

尊人慶元篤行好施鄉里稱長者公邃心理學研究天人

性命宗旨一時聚徒講學賢俊多出其門甲申後杜門不

復應舉避地錢湖之頓畧授經二子長雲蛟字石濤諸生

次卽少宰公也得年八十有一贈通議大夫

三補耆舊傳

四明談助

卷二十三

十七

吏部侍郎仇公兆鰲

字滄柱爲諸生以抗直忤有司遭羅織久而始解嘗授徒

諸暨見士人有室家被掠者傾館穀贖之康熙二十四年

成進士選庶吉士歷遷內閣學士擢吏部侍郎時李光地

陳廷敬張玉書皆在內閣相與講貫益以理學自任以足

疾乞致仕歸五十一年入都祝 聖壽召見問以地方所

聞見對曰去年江督噶禮免官張伯行留任江南士庶歡

勝臣不勝大慶其質直如此公少從黃梨洲

宗義

論學後歸

宗於朱子然著四書講義仍兼采舊聞平湖陸稼書

隴貽

書謂念臺之言不當葺入公答書言學行如劉公而猶以

偏見廢之乎著有杜詩詳註二十五卷晚年好養生家言

兼注參同契行世

詳見錢志

子廷桂康熙壬午舉人諸暨教諭

廷模康熙辛卯舉人孫啓昆乾隆庚辰舉人縉雲教諭

選舉

表族孫國垣字星門乾隆己酉歲貢能詩有竹窻稿

王尚書第

在縣治南尚書王應麟所居其父撫爲崇政殿說書理宗御書飛白汲古傳忠四字扁其堂至今稱王家府

嘉靖志

左瀕河

後臨縣學前街其宅僅餘後樓御書扁額乾隆年間尚在今已無存

湖語自是而南故榭之迢迢者蔣園其最有名矣至若水閣

之疏越

趙侍郎築侍

竹墅之幽清

高使君衍孫

丞相少師學士輅院之徒

園林之盛有如列城

魏丞相陳文定公史忠宣公樓輅院皆有園在湖上

竹林一區則

四明談助

卷二十三

十八

王氏畫錦之都廳

深寧先生封鄞縣伯故所居亦稱錦里竹林其別業

其同巷者尚書

拙逸之亭也

袁尚書似道清容大父也

蔣園水閣竹墅諸跡陳少師概史學士彌堅樓輅院璫諸

傳俱已見前魏丞相杞傳見仲夏碧溪菴下袁尚書似道

傳見城南袁氏下其孫清容學士別建第于小沙泥街

汲古堂

句餘土音王尚書汲古堂

竹林沉沉天宇碧汲古傳忠垂御畫其中孕出雙靈鳥接翅

飛來文五色

謂尚書之父溫洲搗也宋理宗嘗書汲古傳忠四字竹林二字賜之

長公尤克昌

其家文獻淵涵包八極浙東學統溯明招西山東澗遞正席

爰以大宗集大成區區詞科乃餘力稜稜風節遭殘宋大聲

疾呼終何益從此扃戶畢殘年日聞空堂三歎息可憐困學
紀中語此志倔強固猶昔商山四皓魯兩生不以坑儒盡耆
德浮邱高堂濟南叟不以焚書絕遺籍石奮家風在躬行不
以崇詐泯舊澤此語尚書載之困學紀問又見之桃源戴氏譜序天留碩果繫孤陽
由來霜雪不能食莫謂茲堂僅百弓足爲故國扶殘脉遺文
百卷歸羽陵學案文案都剝蝕流傳少作詞科書猶爲舛陋
資典冊尚書學術世徒以博洽視之其實則緒餘也孫枝一綫日就衰錦里門庭
無顏色祇有東壁光瞳瞳夜墮堂前震木石

甬上望族表竹林王氏偉哉深寧之學再世之東萊也先世
本浚儀南渡始來鄞溫州直節實善教子第一深寧第二太
常第三公子昌世不求聞達第四遂初第五共五望其後散

四明談助

卷二十三

十九

處于越居鄞者微

武經大夫王公安道

武經大夫直閣撫之大父也其先開封人建炎初扈蹕南

渡乾道間定居于鄞聞志

直秘閣知溫州王公搆

字謙父博學耿介非其友不與語幼學于里師樓昉爲文
深醇善議論壯歲試詞學科不中乃自誓曰它日必令二
子業有成後於嘉定癸未登進士第同余天錫參知政事
屬教其子弟歲終致束脩以謝堅辭不受曰吾二兒習詞
學鄉里無完書願從公求尺牘往借周益公傳內翰番陽
三洪公暨往昔習詞學者凡二十餘家所藏書余欣然許

之後二子果俱中詞學科公初爲安吉丞歷遷國子正將作監主簿時丞相史嵩之預政乞補外以避官終直秘閣

知温州

詳見聞志

尚書王深寧先生應麟

字伯厚九歲通六經父撝性嚴急每授題設高座命先生兄弟坐堂下盡燭爲期少緩輒怒呵之由是先生爲文益敏疾淳祐元年年十九舉進士先生嘗愾然謂今日業舉子者專以沽名旣得便一切委棄制度典章漫不知省非國家所望于通儒也遂閉門發憤假館閣書盡讀之手輯玉海二百卷遂與弟應鳳相繼舉博學鴻詞科開慶元年帝御集英殿策進士召入爲覆考檢點試卷官先生得一

四明談助

卷二十三

二十

卷曰是卷古誼若龜鑑忠肝如鐵石臣敢爲得人賀遂定第一及唱名乃文天祥也歷遷著作佐郎理宗崩度宗嗣位攝禮部郎掌丞相箋表尋遷學士院侍經筵會冬雷先生疏言十月之雷惟東漢數見當清天君謹天命體天德以回天心守成必法祖宗御治必總威福似道聞之使臺臣駁之出知徽州一年大治召爲秘書監仍兼中書舍人又極言邊事似道更謀逐之會以憂去似道潰師江上復起轉禮部尚書兼給事中階鄞縣開國伯左丞相留夢炎用事先生引歸家居凡二十年自號深寧老人及宋亡益杜門不出所著述只書甲子晚歲自爲誌銘有曰其仕其

止如偃如圖卒年七十四

詳見舊傳

王深寧先生著述書目

古易考 輯周易鄭注一卷 詩考五卷 詩地理考五

卷 詩草木鳥獸蟲魚廣疏六卷 補注王會篇 集解

踐祚篇一冊 春秋三傳會考三十六卷 論語考異一

卷 孟子考異一卷 漢藝文志考證十卷 通鑑答問

四卷 通鑑地理考一百卷 通鑑地理通釋十四卷

漢制考四卷 困學紀聞二十卷 筆海四十卷 玉海

二百卷 附詞學指南四卷 六經天文編六卷 蒙訓四十四卷

小學諷詠四卷 小學紺珠十卷 補注急就篇六卷

姓氏急就篇二卷 深寧集一百卷 玉堂類稿二十三

卷 掖垣類稿二十二卷 詞學題苑四十卷 四明文

四明談助 卷二十三

獻集五卷

清容居士書世綸堂雅集詩卷云吾鄉盛時比屋皆故家
大官咸淳賈相擅國絕惡四明由是衣冠皆爲月集悉不
敢議時事卒至國亡無賣降于外者當至元末年諸老先
生猶無恙時則有深寧王先生師表模範世綸雅集猶有
洛社耆英之遺意

宋王尚書畫像記 鮎埼亭集

往者太原閻丈百詩篤嗜深寧先生之著述三屬人入鄞
求先生之行狀神道碑墓志欲附之卷尾又求其畫像欲
摹之卷首而皆不可得先生孫枝在鄞者零落其在紹之
上虞者亦不知其盛與否也予罷官歸同葛君巽亭爲予

言榆莢村王氏有先生像亟喜往請而觀之亡宋遺民所云咸淳人物面目當時已等之彝鼎况大儒如先生乎先生之學私淑東萊而兼綜建安江右永嘉之傳予于同谷三先生書院記言之詳矣願所當發明者有二其一則宋史之書法也先生于德祐之末拜疏出關此與曾淵子輩之潛竄者不同先生既不與軍師之任國事已去而所言不用不去何待其必俟元師入城親見百官署名降表之辱乎試觀先生在兩制時晨夕所草詞命猶思挽已去之人心讀之令人淚下則先生非肯愬然而去者今與淵子輩同書曰遁妄矣其一則明儒所議先生入元曾爲山長一節也先生應元人山長之請史傳家傳志乘皆無之不知其何所出然卽令曾應之則山長非命官無所屈也箕子且應武王之訪况山長乎予謂先生之拜疏而歸蓋與馬丞相碧梧同科卽爲山長亦與家參政之教授同科而先生之大節如青天白日不可揜也今觀先生之像須眉惆悵端居不樂其當杜門謝客之際乎惜不令百詩見之也

王太常應鳳

字仲儀與兄同日生爲文詞操筆立就淳祐十一年廕將仕郎明年登文天祥榜進士中開慶元年博學宏詞科歷官至軍器監丞時伯兄方草制以嫌改差淮西制置司參議官未幾文信國薦其學宜職翰墨召爲太常博士將以

內制處之甫入國門卽死年僅四十六著默齋稿訂正三輔黃圖所爲詞科文漢郡縣山川風俗記最詳洽得文體

延祐志

靜學居士王世昌

字昭甫尚書深寧先生之子深寧所著述靜學蒐輯考訂贊助爲多蓄書萬餘卷燬于火露抄雪纂至忘寢食書以復完性至孝友入元以來當世諸公以尚書名重謂宜錄其後人薦章交上靜學力辭謂士之大節嗣守爲難敬身所以敬親儻得讀父書求已志以畢此生足矣不願乎外也晚號靜學居士有靜學集二十卷

詳黃文獻集

遂初老人王厚孫

四明談助

卷二十三

二十三

字叔載宋尚書厚齋孫少侍大父左右聞見充積由是熟于職官典故世胄譜牒凡鄉里欲述其先世者多諮問之袁學士桷自翰林歸里問所學學士心折之金華黃文獻至鄞薦爲郡學訓導後改授象山教諭調浦江甫閱月卽解官歸養後累薦不赴嘗誡其二子陞隲曰承家不在名位而在不失身敬身不在外貌表暴而在毋自欺讀書當貫古今處世必審進退其有同流合汙以爲通矯時干譽以爲高患得患失以終其身者吾所甚惡非所望于汝也晚號遂初老人

詳滎陽外史集

著遂初集三十卷

聞志

王隱君寧孫

字叔遠遂初之弟初治詩後治春秋其於文章制度尤致

意焉僉憲戴東臯按浙東民安其政適被誣繫郡隱君奮然躬率士大夫抗疏臺端戴得復職將薦剡謝不與通終不仕而卒

詳榮陽外史集

湖語名德之盛更有浚儀之王抗直則忤鄉衮而避位文章則追塾師以升堂

王直閣搗學文迂齋以忤史氏不達

汲古傳忠御書煒

煌理宗所賜

堂堂深寧正學是宗薈萃鴻詞比轡三洪六經百

氏旁推交通孤忠草詔三軍動容大命既去幅巾潛蹤如偃如圖以保令終默齋亦佳不愧難兄麗澤科第三輔圖

經太常應鳳

尚書有子遁跡柴門不忘其父肯辱其身過庭有

傳是謂遂初之文孫

靜學先生世昌承父遺意不出教其子厚孫世稱遂初先生

四明

累世之文獻莫與論也

四明談助

卷二十三

二十四

王處士節

字孟禮號墨莊深寧先生後人也

耆舊傳

又王氏族望表稱毛詩王氏文貫爲一望

王教授文貫

字貫道其先奉化人蚤嗜學與鄉先生余端臣遊登寶慶二年進士教授真州遷宗學諭精毛氏詩說以慶源輔氏爲宗從游常數十人同郡知名者若奉化汪元春慈谿黃震俱以議論政事稱於時貫道由是名益著

至正續志

王進士宗道

字與文別居奉川與兄文貫同領鄉薦第嘉定元年進士嗜古人之學窮渺深幽仕不竟所學而著述甚富有易說

指圖十卷二禮說七卷書說六卷觀頤悟言一卷讀詩臆說十卷淮鹽論二卷雜錄二卷聞見因筆一卷詩文五十

卷至正續志

郭侍御第

縣學前郭氏先世故滁人以勛籍世襲于鄞遂爲寧波衛人世襲衛左所百戶郭眞

河南息縣人父得辛卯年歸附甲辰年渡江隨常國公吳元年隨楊大夫克明州眞選充旗手衛軍歷充總旗二十年取勘年深授寧波衛左所世襲百戶永樂七年十七年兩次隨往日本公幹 眞傳榮 和 鑑 澤 世勳

遇例納授
衛鎮撫 體仁

四明談助

卷二十三

二十五

郭侍御振培

侍御故滁人以勛籍世襲於鄞至崇禎丙子舉于鄉始以孝廉起家乙酉丙戌間嘗以監察御史仕閩死於兵自是

遂爲鄞人結埼亭集

孝廉郭芥子先生永麟

芥子先生爲侍御振培之孫雍正元年中鄉舉上公車不售遂不再赴精湛理學貫串先儒之言于古今詩文家皆能別白其源流門戶一時學者多從之遊初史雪汀榮與之善雪汀以事陷縲紲會婚期不得出先生爲代坐囹圄者浹旬後雪汀以弓影之疑而告絕所居僅隔湖水未嘗一通聞問有及其事者先生輒以他語亂之及先生卒雪

汀扶杖臨其喪撫棺長慟而去蓋亦自悔也

結埼亭集墓志

長子景行乾隆辛酉優貢生庚午舉人次子景兆以老人卷舉于鄉會試賜檢討孫彥忠乾隆庚戌歲貢生

同族和宣德八年貢士知縣 宣景泰丙子舉人知縣

振圭順治間歲貢生永嘉縣教諭 近仁入象山籍康熙

甲子歲貢生 彥博字南英康熙戊子舉人仕通城縣知

縣所著有一家言 乾字研漁乾隆庚子進士杭州府學

教授精時藝兼工吟咏著有存稿 拱斗嘉慶戊寅副榜

郭文學傳心

字存一淡于名利年甫及艾卽不赴省試而性好山水遊

歷浙東西觀太湖登天台石梁嘗與徐悔廬遊四明以不

四明談助

卷二十三

二十六

借代筍輿日行數十里倦則臥石上潤以酒膈必欲力窮其勝歸有遊記後以足疾困于家無可消悶因製一小車令童子推行輾轆道上小兒觀者塞途每至一處飲酒談天藉以自適平居尚敦睦嘉慶丁丑親舊以考案被累者數人爲之奔走資助不辭勞瘁弟傳源諸生子拱奎今已食餼于庠姪拱訥亦諸生

陶氏

贈州同陶公泓字書田先世自會稽陶家堰來父元奎康熙甲午舉人公幼承庭教中雍正十三年副榜考授州判分發江南署新陽縣丞巡撫莊有恭一見引重適淮河決命以查勘水災具稿將回呈巡撫至決口舟隨流而下遂覆

溺死巡撫奏其事贈州同賜祭葬蔭一子入監詳錢志族孫

樽字起巖諸生能詩間作山水圖畫落筆蒼秀著渡齋詩

草

同族藩嘉靖丙午歲貢訓導 天忠嘉靖庚戌進士知縣

又陶氏爲方氏部曲以故官例徙鳳陽至洪武間厓仲爲按察使請于朝特許迎養徙籍明史甬上族望表陶氏福建布政使

鑄一望

布政使陶公鑄字厓仲以字行洪武十六年以國子生擢監察御史糾彈不避權貴劾刑剖尚書開濟至死直聲動天下未幾擢福建按察使誅賊吏數十人布政使薛大方貪暴劾奏之并逮至京訊實坐大方罪詔厓仲還官公與薛

四明談助

卷二十三

二十七

大方偕召至京時民爲之詩曰陶使再來天有眼薛公不去地無毛已而果復任錢志採明一統志

馮氏祠誤稱忠勤祠

明萬歷間巡按御史彭應參爲邑人御史林可成建忠勤祠建祠事見卷未本傳相傳祠在御史宅右後宅歸于洪氏遷祠于縣學

前硯池之左面西近聞林明經覲陽說此非忠勤祠實係先伯樹滋所建以祀舊業主慈邑馮布政蓋布政建宅於千歲坊有神像塑于西廳後宅歸我林氏神像無安頓適修縣學先伯爲首事遂買學前隙地建祠以祀之其神像面東東有門庭圍之以墻後隣人利其門庭隙地徹去後墻將神像轉西臨街人遂以爲林御史祠矣聞之如夢斯覺世事滄桑類

此者甚多筆之以警輕信之失

白鶴廟

在縣治南相傳宋王應麟建祀文昌之神錢志廟在王府西廟

前何氏以先世隨征臺灣有功 賜爵都司近代連舉鄉貢

何喬嘉慶庚申舉人 美濬丁卯舉人秀水教諭 岱癸酉

舉人

李中丞第

縣治南普照橋兵部侍郎李澐所居聞志侍郎係御史循義之

曾孫推官生威之孫以僉都御史巡撫貴州自車橋遷居於
此

太保李忠毅公澐

四明談助

卷二十三

二十八

字長儒號茂嶼宋太尉忠襄顯忠後七傳至循義始以進
士官御史出守衡州卽公曾大父也侍御公次子生威舉
于鄉官鳳陽府推官是爲公大父生三子長曰德先諸生
居鄉有盛德是爲公父公少負奇質讀書數行下登萬歷
二十九年進士授行人擢御史例轉廣東鹽法僉事時粵
中鹽法大壞公至剔諸宿弊法嚴而得其平商與民並大
蘓因條所行爲鹽政考改山東海右叅議值歲大禘公採
酌荒政以次畢舉卽擢本省按察御史蓋公在監司起僉
事爲外臺長其舉卓異俱第一四十七年公以僉都御使
巡撫貴州宣慰司安堯臣死子位幼族人邦彥專兵柄與
永寧宣撫奢寅陰結爲亂其患已成會朝議徵西南兵援

遼邦彥欲乘以起事詣公請行公諭止之邦彥歸益爲反謀公累疏請增兵益餉爲豫防計而當事忌公威名置不問公因六疏力請疾天啓元年始得請以王三善代而奢崇明已反重慶陷遵義貴陽大震公念封疆受寄遂復留視事而黔所屬水西安氏與奢賊世姻本同謀其同知安邦彥最狡難制水西去貴陽僅七日公雖日發民守湄瓮戰老君關復遵義郡縣聲言摧藺賊而所憂惟在肘腋圖厚爲之脩然貴陽奇正兵止三千糧匱守無具公乃佯許邦彥討藺賊先給少餉冀稍緩其謀而急從滇中借餉二萬募鎮筸兵三千義勇四千合奇正兵約七千市硝黃一萬七千斤鉛鐵萬斤聚米一萬七千石俱畢集得恃有脩

而奢賊傳已破成都邦彥遂反僭稱羅甸王合苗仲龍蔡兵數十萬直趨貴陽初水藺合謀奢寅欲取成都作家邦彥欲取貴州作家西襲雲南東擾偏沅荆襄遂窺江南其志不小公諜知其謀謂我惟堅守貴陽斯其勢足控制滇蜀此國家所開一綫官道係西南安危甚重公乃登陴洒血與吏士共伸大義分諸營列城部署甫定賊步騎奄至公身當賊衝賊望公旗鼓所在盡銳攻之公命將士禦賊奮氣百倍賊據西城外石坡其高踰月樓數尺賊自上投矢石如雨城幾陷公急命集大銃夾強弩擊之火燄中見人屍若羣鴉攪搏從空中飛墜數百賊俱下坡走復造廂車高三丈中可伏數十人外復布枋革用婦人雞狗作厭

勝火鏃不能入下推轆轤臨城城中哭聲震天地公命烹一彘雜以斗米飯投城外作遙飼雞犬狀再取虎豹皮張城樓以被不祥銃石遂中賊廂殺數人賊尚堅持不動公乘黑縋健兒三人持火藥從廂下燒之廂立燼賊俱驚墜死者半又編竹籠數萬中盛土爲臺乘城出墀堦一丈公立撤某寺鐘樓建城中賊翹望氣奪盡棄籠去公曰獾賊謂我徒能塞門自守耳非出兵大殺賊賊不畏我乃突發壘土開門使銳卒驟前砍賊賊驚敗斬首甚多自後每戰賊必敗其氣大阻安賊更定謀謂惟四面重圍絕其餉道可坐困貴陽遂不復苦攻會都督張彥方都司黃運清率兵來援與賊戰於龍里兵敗賊知援兵怯而城中糧易盡

乃佯追二將尾其後縱使入城時二將兵八千冒稱一萬四千日支米一百四十石至改月尚不決一戰公謂監軍劉錫元曰中賊計矣古云去兵去食正在此時乃使將率兵九千出各硎就食城中尚留主客兵六千初人給米一升漸減爲五合至一合遂噉死人肉未幾遂烹活人米值漸騰至二萬錢一升食糠覈草木敗革皆盡公力旣竭預以刀纆授家人使各自爲計公身扶疾登敵樓城上惟輪疲卒數十人枕甲臥然賊每窺城梯而上公奮臂一呼吏士俱強起砍賊跳踈自死者無算城得全自二月七日至十二月七日新撫軍王三善率援兵轉戰至城下賊潰毒圍始解亢守三百日大小凡七十餘戰殺賊萬人得賊仗

數千陣亡兵七百餘俱餓死城中人十萬僅存男女小弱二百餘人遺民感公忠義相率就刀俎竟無一人叛者朝廷獎守黔諸臣進公兵部右侍郎公仍稱疾歸里崇禎改元三年上召對羣臣給事許譽卿以宿憾奏公嘗受安氏金盆致生釁幾陷公罪御史毛羽健出與辨甚力復疏陳守貴陽功苦實過睢陽公事遂大白再加一級賜金後數年公病卒於家年七十二公擅風儀體長眉目如畫望若天神性廉介持操甚厲歷官至開府不受人一物亦未嘗知其所饋何物也既出貴陽圍城名震天下然終老泉石不復用及公歿兩京繼陷行朝追錄公以風勵天下贈太子太保兵部尚書諡忠毅官其一子文緝大理寺副卿兼

中書舍人公下筆老健生平經濟得盡發於文章撫黔疏草人以比陸忠宣嘗使客作書畧爲裁定數字輒煥然意出它詩文集並行世

果堂文鈔本狀

著撫黔疏稿全黔紀畧

開志

李錦衣文經

字爲章忠毅公長子負質敏悟年未冠補諸生事親孝更篤友于尤所難者忠毅公被圍貴陽孤軍獨守幾于析骸易子手書示先生借援辰沅先生從沅道接父書星馳報撫軍王公三善適有忌者阻其議事竟寢不得已子身走楚蜀泣血請兵兵達辰沅忠毅得爲內應黔圍始解父子亦完聚而先生自壬戌至丙子相隔一十五載始襲蔭錦衣蒙難生前恩榮死後天之報仁孝如是而止

詳見家傳

李文學文緝

字于光忠毅公第三子諸生甲申後不涉世途放浪山水間工諸體書兼善繪事與楊齊莊陳燮五林荔堂諸先生結吟社顏小室曰亦是山房風流瀟灑無紈袴之習家傳

伴梅主人李允睿

字思曰忠毅公孫博士文緯之子方貴陽被圍時伴梅尚幼適發痘事見後朱母保孤傳中忠毅公諸孫五六人君最賢爲人溫恭有緼藉善文章自稱伴梅主人有勸之應試者笑而不答同里林繭菴先生稱之以爲真忠毅公後人也

朱節母瀕死保孤

四明談助

卷二十三

三十二

李母朱太孺人兗州公女孫歸忠毅公仲子博士君公初以大中丞撫貴竹博士君從行至數月而卒于官舍時博士君之子思曰方幼太孺人日夜攜思曰哭博士君柩前曰所未從君九原爲此三尺孤耳及忠毅被圍急署中食絕惟日取故牛馬革及野草雜煮啖之思曰適發痘太孺人覓得白梁數粒投沸湯飲痘漿輒起歷三百日而圍解城中才餘男婦二百二十人太孺人母子出貴竹城門得不與十萬人同死而與二百二十人同生此真所謂瀕死而尚未死者也太孺人歸後日夜課思曰讀書思曰旣漸長能自成立而太孺人年五十而忠毅公謝世復二十年太孺人鶴髮尚強飯適當誕日思曰率其家人前跪奉爵

爲太孺人壽而思曰所知交遊皆登堂以次上觴尚有其
大父父時故客華堂無恙坐食依然而太孺人春秋遂七
十矣昔漢書載耿恭守蘓勒力戰踰年僅餘吏士十三人
生入玉門不爲大漢恥惟忠毅公有之南史載垣曇深妻
鄭氏從夫至交州夫死鄭氏獨攜其幼子文凝萬里還郡
親授子經惟太孺人有之夫忠毅公提五千疲卒當獾鬼
十餘萬血戰經年矢盡致死而卒全忠勇得以一片孤城
手還君父卽太孺人亦不敢遽從一刀一縵竟得抱七歲
兒歷鬪燄火中間關還里教子四十年以至今日蓋忠
毅之所以報社稷與太孺人所以報李氏忠臣貞婦卒能
成事以不負國家其志一也

杲堂文
鈔壽序

四明談助

卷二十三

三十三

戴中丞第

縣治南普照橋西都御史戴鰲所居

聞志

戴氏世居湖田鄉其族有會川莊自都御史鰲遷居于普
照橋西御史傳并御史之子深州判官士文曾孫蟬隱先
生經世諸傳俱見桃源戴氏下

丁中丞第

縣治南普照橋都御史丁繼嗣所居

聞志

丁氏自稱宋參議大

夫顛之後甬上族望表丁氏都御史繼嗣一望

副都御史丁公繼嗣

字國雲號禹門萬歷十一年進士由刑部郎歷進副都御
史巡撫閩中公爲人坦厚善善意長人言其開府有薦無

劾終不失長者所著蒼虬館集行世詳見耆舊傳

丁監軍泰清

字在躬鶴山諸子之一也少承都御史膏梁之蔭田連阡陌華王之難傾家救之又以連年輸餉盡喪所有蕉萃而

卒續耆舊傳

都御史之後紹統順治甲午副貢嶠字鎮洲嘉慶庚午舉人從弟春耀同科武舉

普照院

縣治西南二里舊號福明院唐咸通三年建宋大中祥符元年賜普照額嘉定十三年火重建元至元二十六年火重建嘉靖間地歸都御史戴鑿置宅萬歷間其宅又售于都御史

四明談助

卷二十三

三十四

丁繼嗣敬止錄左有普照橋以院得名

雲在樓

在竹湖陳御史朝輔建以爲藏書之所

知縣陳清橋先生言

字伯實以隆慶間明經授遵化訓導歷遷知石城縣豪家猾吏相通爲奸盡捕治之縣中以寧在官四年適有直指按部索先生金先生笑謝不應卽日解官歸以行誼見重里中卒年七十七耆舊傳子天爵孝友敦篤克繩先德孫朝輔傳見後

附詩一首

江右解綬歸憇西陵戴氏

愛菊辭彭澤看山返會稽一琴披月潤雙袖御風齊潮迅
人聲沸舟平樹色低主人安道齋訪臥却相攜

陳太僕朝輔

字平若一字葦菴萬歷四十四年進士累官監察御史乙酉晉太僕寺少卿其所居在竹湖有四香居雲在樓掛松軒極林泉之勝尤多藏書甬東詩括選家四人太僕其一也所著有葦菴集子自舜爲證人書院高弟子續耆舊傳

陳公子自舜

字小同一字堯山御史朝輔之子其年稍晚出甚愧其父之所爲以是頗不欲人稱爲公子梨州先生講學甬上小同從之終日輯香經學兀兀不休其人強毅方嚴于名教

四明談助

卷二十三

三十五

所在持之甚篤生母沈氏不得于嫡卒于杭小同尚少長而補行三年之喪致哀盡禮隱居終身一日梨洲座上或言天啓時某官以某物贈奄卽御史所爲也小同爲之數日不食喜購書其貯藏爲范氏天一閣之亞結埼亭集七賢傳

附陳母沈孺人墓誌

節南雷文定

余友陳同亮改葬其生母爲之稅服三年夫稅脫者過時而服其日月亦近耳顧二十餘年之遠則與生不及同例同亮不行改葬之總而服已絕之服率意違禮無乃蹈子路當除不除之過伯魚旣除猶哭之失歟已而陳子介眉狀其事乞銘于余而後知其不忍哀愴之情始出于此也孺人姓沈氏杭州人年十八歸于侍御平若陳公公故鄞

人未有子嗣遂買屋武林以處孺人明年同亮生又四年
嫡母周恭人歸同亮而子之孺人仍處武林思子不置踰
年而卒年二十四侍御爲文哭之權厝於湖上當是時回
亮壓於嫡母於孺人之喪不能親焉又二十餘年侍御孺
人相繼謝世同亮始迎喪武林歸葬於鄞詩云欲報之德
昊天罔極此凡爲人子者之言也孺人亡以思子爲之子
者又獨何心宜乎同亮之哀于凡爲人子者加一等矣檀
弓兩卷皆言物始三年稅服自同亮而始何必有例乎嗟
乎先王制禮以斬齊功總爲其文以不飲酒食肉處內爲
其實昔之居喪者雖文實未必相稱然猶勉強爲之不敢
廢也二十年以來所謂喪服者率加元絲于首蒙黑繒于

身是孔子之不以弔者而以待其父母蓋三年之喪從
是而廢矣夫于天下之所共行者莫或行之况能行天下
之所不行乎吾欲以同亮之事書之爲天下諷也

同亮名自舜庠生

陳南臯先生汝登

字山學太史錫嘏之從子大理汝咸之從弟其先世出自
后岡先生傳見後所營陳氏下
句餘土音賦南臯家園故蹟

竹湖坊

當年后岡文苑之雄自桓溪來宅我湖東累傳怡庭以經
術起證人講社首座是擬格物心傳不肯隨聲

怡庭于南雷格物之

說不甚符同故南雷
作墓誌微詞及之 乃來湖南以授諸生菘竹漪漪崇坊
故址絳紗臨之有斐君子

雲在樓

太邱諸眷同源異流曰故太僕園林清幽惜哉雋才而乏
大節佳郎一洒足稱英傑謂同亮
先生乃偕同社素心相於割
我第宅以諧喁于竹湖之旁有雲五色繫之維之永朝永
夕

四香居

四香迸合以娛之子芳風不散鳳鳥萃止茶烟酒氣掩映
晴霞誰云下界列仙所家

含青

四明談助

卷二十三

三十七

縹碧千函願言綢繆帝青迢迢集我上頭惟此帝青莫茹
莫吐醞之函丈以成洞府

挂松軒

長松礫砢如龍之吼小軒挂之驚濤穿肘昔者諸公同聲
和鳴上有兔絲下有茯苓而今寥寥憇遺一老兀坐此軒
歲寒不槁

帶水池

門前帶水得名金紫七葉清芬猶落人齒引入名園曲沼
紆餘時代雖更晴波自如勗哉明德長如此流以嗣前德
不承之羞

山廳

何來山骨橫陳都廳巧匠之力足移蒼冥試看小草竇間
濃綠一堂春風以成茂育

息廬

蝸角小廬薪火脉脉誰云坐忘羣動所宅藏焉修焉栖神
於寂願憐憧憧惠我三益

雲石

四明萬山朝宗湖南結爲一拳其光蔚藍萬山非夥一拳
非小膚寸之雲足周八表嗟茲神物誰爲主人時時被除
滌彼塵氛永保黃髮春光不夜長共天根以鎮粉社

東南臯

翰林經術溯南雷大理聲名海內推在昔烏衣推令器于

四明談助

卷二十三

三十八

今鶴髮著新裁菜羹蔬食貧而樂詩卷書籤老不衰辱以

契家陪社末莫嫌頻過竹湖來

翰林謂怡庭先生大理謂怡庭子汝咸

南湖林氏

甬上族望表南湖林氏徵士宏珪一望

徵士自北郭遷於南湖祖叅議祖述父祚隆字永如祖述之
叔子崇禎中以孝秀徵至京因兄棟隆爲吏部侍郎避嫌辭
歸晚居剡源九峯山中徵士亦承父志不試傳俱見北郭林
氏下 林沛乾隆丁卯歲貢訓導沛孫鯤字象厓諸生

又南湖林氏

甬上族望表大理評事時躍都御史時對二望

諸林皆特進保之後其分居帶河者稱南湖林氏

大理評事林公時躍

字霞舉號荔堂繭菴之兄以明經入太學少弟時象亦有名時稱三林魯王監國授大理評事不受少與華職方吉甫同學吉甫死華夫人將投繯忽徘徊曰職方一子已殉僅存一子挈之死則絕嗣留之則辱將若之何其時董戶部守諭高隱君斗魁輩昕夕造門勸以早自裁恐一旦發遣且卒卒莫指手足華夫人既聞命相聚商榷荔堂先生曰是易耳乃竊取職方之子匿于家而取瘡子以代當是時利發難者方眈眈然誓不盡殲諸人血嗣不止諸大吏亦以時勢有關偵羅四出顧先生行之泰然踰十年累行肆赦爲之婚哭而誡之曰汝勝國忠臣之子也汝父死吾

四明談助

卷二十三

三十九

捧頭砥血而殮之汝母死吾躬市櫬木焉吾亦不料其得保身以保汝也今幸矣吾不負汝矣乃爲之復姓而遣之諸遺民爲賦孤兒行以紀其事晚年與徐先生霜臯緝甲申以來粉社死事諸公各爲之小傳而取其生平著述之有係于名節者附之曰正氣錄而朋鶴草堂集約爲六卷

卽編之正氣錄之後

結埼亭集阡表

題林荔堂明山遺民紀述後

高隱學肘柳集

昔宋之亡方鳳吳思齊嚴侶謝翱之輩在婺鄭思肖在吳龔開在淮葛慶龍在越王炎午在豫章其一時詩文予多讀之不禁低徊慨然因疑吾鄞在南宋才最盛斯時何無鳳等一輩足爲甬川重者及予爲敬止錄一書搜討古實

乃得樓伯淵史搢叟陳天奇俱以士人守義不屈高蹈子處風規足頡頏諸君間然竊怪數人絕無詩文往復可尋之迹文獻放廢至此因并疑此時果僅此數人否也頃自國難以來吾黨之士或殺身以殉或賫志以歿或流轉四方未歸予于辛亥之春爲耆社尚有九人焉徐子我庸王子无界邱子梅仙林子荔堂周子栖烟徐子霜臯予叔廢翁暨錢子蟄菴歲時觴詠百年爲期以勵晚節於冥頑域中孤行一意庶幾方鄭龔葛之風年來漸有零落作古人者獨我庸荔堂棲烟霜臯予家叔姪在耳荔堂乃爲紀述一編嗚呼龔先生見方先生詩曰有本之言在人倫不在人事在天道不在天時豈不信哉夫方鄭諸公而在則婺我庸荔堂栖烟尚可主此席三十年不替其尚永終夙夜哉

副都御史林公時對

字殿颺號繭菴宋名臣特進保之後崇禎庚辰進士受知倪文正公門旣釋褐官行人時年十八常熟錢侍郎謙益有盛名招致公公不往于同官最與劉公中藻陸公培沈公宸荃相暱或問冷官何以自遣對曰苟不愛錢原無熱地時人歎爲名言已而北都亡赧王起南中以吏部都給事中召公在科中時局正恣其昏狂公以輪對上三摺言史督相可法之軍在江北進戰退守當假以便宜左都御

史劉宗周四朝老臣天下山斗當置左右翰林檢討方以智忠孝世家間關南來不當誣以傳聞之說並留中不下當是時臺省混沓邪黨過半獨掌科熊公汝霖掌道章公正宸稱望諤諤顧皆引公爲助阮大鍼深惡之乃嗾方國安以東林遺孽糾之遂與同里沈公履祥偕歸南都亡魯王監國召爲兵科給事中累遷副都御史前後封事凡數十上如八要六箴強主德勤聖學其大綱也而最得罪于王之仁者在爭塞東錢湖及興牙行諸稅以充兵餉最得罪于方國安者在請誅馬阮最得罪于諸中官者在禁奄黨之復用于是國安以東林遺孽糾公遂去國初公以前御史姜公塚兄弟避地天台人望所歸請召之御史不至

其弟赴軍公又力主渡江熊公之下海寧公實贊之至于東江雲散亳社再墟而公年尚未四十轉徙山海間及歸家門破碎乃博訪國難事隨所聞見折衷而論定之斜日荒江以此消遣而已久之徵車四出公名亦豫其中以病力辭不赴年九十一卒著有繭菴逸史繭菴詩史冬青集碎筑集表忠錄繭菴雜錄晚年合之曰留補堂集

結埼亭集墓表

參續者舊傳

續耆舊傳後記云先公遺言曰吾年十五隨汝祖拜公床下自是常樞衣請益每間及桑海諸公一事必舉數十種野史或文集以証之其博如此嘗語吾野史之難信有二彭仲謀流寇志僞錯十五出于傳聞不審是君子之過鄒

流漪所作則有心淆亂黑白是小人之過而綏寇紀畧爲
流漪所竄改深爲可恨一日董文曉山以所作張巡檢傳
來公一見流涕曰嗚呼檢討檢校及巡檢之改爲簡也以
避先帝諱也逆臣馮銓降北特疏復改簡爲檢以示先帝
之不足念也其修怨于故君如此令人思食其肉足下亦
奈何忘之吾腸斷矣公語未畢曉山與吾不禁淚潛潛下
先君此語去今幾二十年因作公傳而并及之如見公唏
噓流涕時也

附林都御史傷今五咏和荔堂

留都

百靈扈蹕洛陽來江左龍興紫極開分闈列藩高四鎮攀

四明談助

卷二十三

四十二

鱗佐命盡三台烟花浪子營金穴紹述元兇起草菜君側
未清先撤禦長江天塹霎時摧

馬阮二奸買官粥爵日與正人爲難 黃澍同左帥堵

上游避賊露檄假清君側馬阮撤靖南守蕪湖北兵因

以渡江 楊文驄守京口亦馬阮黨也

江東

薪膽沼吳舊越畿魚頭幸傍日邊飛千羣貔虎濤聲壯萬
艘艨艟日影微吞噬何人驅瘦狗養癰無計制封豨聯鯨
齊向扶桑去坐使蠡城擾鐵圍

日出屋上游鯉魚飛上頭爲監國應運之讖 王之仁

守西興恣睢跋扈盡奪諸義師餉 子鳴謙在蛟關收

遼將大掠寧姚

天興

天潢疎屬起南陽霞嶺三關鞏內疆只道唇亡齒未冷何
知鷁去蚌遭殃紛紛蠻觸爭甌脫漸漸狼吞到梓鄉辜負
千官森劍佩一年巢幕又滄桑

閩與魯爲難盡督溫處金衢之賦解天興漸至寧台

翁洲

捧日虞淵島嶼間鼉宮鰲極勝厓山長鯨鼓浪來吞噬黑
霧漫天絕往還玉女乘風飄海角遺民化碧盡周頑只今
白骨中流葬萬樹啼鶉泪竹斑

北兵渡江忽大霧瞭望者不見直抵翁洲監國率舟避

四明談助

卷二十二

四十三

去一城遭害

端溪

一旅重興百粵鄉金支紹歷桂飄香苗夷慕義歸新主元
老抒忠復舊疆無奈西風吹落蕊遂令卉服禍蕭牆錫波
江上留遺恨釋甲奔降罪□昌

閣部翟公留守桂林肅清兩粵 黃花玉蕊吹墮東籬
讖皆前定 鞏昌王白文選以三萬人守錫波江奔潰
投順

句餘土音擬薤露詞

江天寒

林評事保孤

古稱覆巢下其卵不可完誰從雕虎口保此一綫延夫君

眞健者俠骨奮義肝摩挲孤兒二十年哭謂汝孤昧汝天
汝父汝母死辛酸秋原魂散江天寒勗哉汝孤毋忘汝世
讐謂謝氏汝孤弗率將爲汝父羞世無王成李固絕世無朱
震陳蕃滅夫君眞健者義肝奮俠骨

詩話荔堂評事匿華氏孤兒凡二十年始告以姓王成
朱震不足專美於前矣

者臣死不早

林太常觀劇

奉常樂府空天寶梨園散別譜空傳楊司農清音誰擬文
中翰阮家院本奏秦淮亡國之音何漫漫可憐亡國諸大
夫愧殺凝碧池頭樂工且萬萬老臣何所之聊倚籃輿看
百幻阿誰寫出天崩與地裂風雲晦冥桑海汨老臣死不

四明談助

卷二十三

四十四

早洒盡當年未傾血

詩話太常八十外憤悶無聊嘗行市中觀劇一日忽見
演流寇破京師者大哭而絕良久始蘇自此不復出

又林氏

侍御林公可成字宏志號竟宇萬歷八年進士知太康縣濬
河渠鋤豪猾邑有蝗爲文遣之忽大風起蝗飛出境一縣
以爲神召爲南臺御史值南北游饑再疏請賑俱報可辛
卯監應天試方操筆點名暴卒後御史彭應參行部命立
祠以祀公題曰忠勤祠詳見耆舊傳子復言饒才學應試浙闈
二場畢聞父訃卽時奔喪而復言卷已擬元人兩惜之聞志

林御史宅基至

本朝雍正間售于洪氏今宅內井欄

石刻尚有御史井字樣洪氏饒于貲世有善行可稱富而無驕乾隆丁丑間大修天封塔重上塔頂以捐費不足未能落成太學朝枚出數千金完其事今一孫桂芬號佩弦入庠貢成均曾孫八人得入庠者五食報未有艾也 佩弦有別業在宅之西因園右卽金紫巷遂以巷名名其園有古香樓一隅亭三友亭漱石軒寄廬響石亭篔簹徑之勝一樹一石位置品題居然故家風味嘉慶壬申臘月快雪初晴曷與黃東井王小竹盧蓬廬諸友赴二簋之約游歷林亭因憶少時蓬廬與主人佩弦劉君定國讀書園內風景依然而定國已久眠地下撫今追昔未免有情作滿庭芳一闋以寄慨云六出花

四明談助

卷二十三

四十五

飛堆盤糝瓦林亭一夜銀裝羣仙高會洞府舉霞觴玉樹君家絕勝森然列庭有餘香還相賀枝頭簇簇梅蕊冠羣芳循廊依舊是闌干屈曲徑闢篔簹只主人相對潘鬢添霜皤腹盧生夢醒應追憶脫髮劉郎當年景白頭重遇莫負好風光適記舊遊并附錄此

胡處士居

與林氏同里巷

胡處士其標

字長齡號以建諸生講學里中及門皆名士如太常卿林公時對其最著者嘗序公詩曰先生著作甚富甲申之際盡焚生平詩文謝絕人世往來布袍幅巾獨處小樓非祭祀足不及戶卽以同里巷處門下而不得一晤晚年取靖

節集編錄悲歌浩歎時發于詩然旋即焚滅不存一字吁

其人可知矣

三補耆
舊傳

胡司訓耀庚

字元白號日電兒時父長齡先生督課甚嚴通五經諸史
弱冠入庠甬江向有澹園紺溪二社社中金澹菴黃菴園
陳介眉相繼聯飛公屢躋場屋諸先達在都致書慰問泊
如也公素貧事親必先意承志喪葬皆身任之不及兩
弟生平著作甚富尤精性理以康熙乙卯歲貢授平陽訓
導三補耆
舊傳李譽樵先生爲之贊曰道肥心泰德厚氣饒齊
邦千駟陋巷一瓢續耆
舊傳

竹湖

四明談助

卷二十三

四十六

今蔣家帶巷之腰帶湖卽竹湖也舊有竹湖坊在南湖深處
與細湖接今淤爲小池結埼亭
集外編腰帶湖今稱腰帶河里人護
以石闌其水清澈無比雖旱不竭尚有小溝遺跡通出蔣園
廟河

湖語更訝淑姿之豐盈胡有時而消瘦腰圍如蜂帶垂如繡
潺潺浚浚折旋遷就宛然小蠻與我邂逅卽今所稱腰帶湖
蓋古之竹湖地也
林氏近性樓

林奉直廷鰲字靖南別字澹吾以諸生捐授同知大理評事
荔堂太常卿繭菴二先生其族祖也澹吾讀書尚義工音律
淡于名利有別業在宅旁因自題曰澹吾廬平居交好多佳
士稱莫逆者二人一爲韓明經崑號朗山能詩善書法一爲

孫太學浙號意舟善圖畫二人皆美質而韓優于學以戊申副貢曾舉孝廉方正澹吾與之善每聚居朗山撫琴意舟鼓瑟澹吾撥阮專好古樂絕時調繪爲三友圖名人多題咏其上所居之樓曰近性閣學奎照爲之記

林郡司馬近性樓記

辛巳夏五月余奉命閱翰林孔目官卷得王子竹生知爲浙東名士因時於退直餘輒招飲言次備述其友人郡司馬澹吾林君家居之樂並以其所居近性樓欲丐余記余與司馬未侔面而聞竹生言竊深慕其爲人竹生言曰樓高五丈分爲五室四旁夾窻遠望若巨艦故又名停艫樓中懸佛像一蓄琴一瑟一餘皆圖書彝鼎名畫法帖春餘秋初司馬靜坐

手七絃或二十五絃清韻間作好風時來下則危石礚礚累小山旁濬一池駕以曲梁游魚出没悠然得濠濮上意外則翠竹綠蕉碧梧蒼松驕陽不炙清蔭互生雜以時華異卉嬌鳥珍禽入是樓者咸流連不忍去而要其樓之所有皆以求其性之所近也余因之有感焉夫以司馬少讀書負奇穎稍長補博士員則性宜於貴近家豐於財則性宜於富近世之持爵里刺數行東馳西突以仰息崇轅者非爲欲貴乎較鎚銖爭贏絀以飽其身以肥其子孫非爲欲富乎所以故者蓋不見夫貴非其貴富非其富也則何怪性之終溺而無以得其所近哉今司馬不役役于富貴性空諸想於佛近性任真於琴近性素潔於瑟近山近性之靜水近性之靈竹近性之

虛松近性之堅梧近性之孤特蕉近性之卷舒既入世而出世視有家如無家則洵乎樓之所有皆以求其性之所近也顧吾獨怪人人各有其性之所近而人人不克如司馬之所謂近者以爲近且卽克如其所近矣而天又從而束縛之馳驟之終亦不得其所近而別有所近焉余之所由心慕其爲人而樂爲之記者其在斯乎其在斯乎竹生其卽以余言書以贈之內閣學士玉亭奎照撰

四明談助卷二十四

雲石脉從廣福寺後度提署前河起坡阜沿河北行其分水東行轉北出廣濟橋再北行合平橋河來水同轉東出市心橋漸向北入萬壽寺西河達大河西行出傅家橋漸向南轉西由提署下沙出均奢橋轉北出九曲巷橋後所營橋達平橋河其上有高氏舊宅廣濟橋黃氏黃宅內舊河沈相國第提督署萬總兵衙董給事宅游仙廟三鳳街范氏紫薇街余氏菜園廟千歲坊李氏曾家滙南湖頭等蹟自南湖雲石起北至平橋河爲府治正朝沙者止此

高氏舊宅

明刑部郎中知肇慶府高萃之居 國朝潮州推官斗階亦

四明談助

卷二十四

一

居於是宅後有別署古木尚存東畔一曲歸于王太學仰山碧沼修廊花柳楚楚時與名人觴詠其中高氏世傳俱見中丞第下

廣濟橋黃氏

禮部侍郎黃宗明自冷靜街移居於廣濟橋西其第尚存甬上族望表黃氏自閩來侍御史龜年一望 後族望表云廣濟橋黃氏宋御史龜年之後禮部侍郎宗明河南僉事元恭二望

侍御史黃公龜年

字德邵其先福州人後葬父于鄞因家焉登崇寧五年進士歷官殿中侍御史會邊報王倫來歸公以秦檜植黨專

權阻止恢復上書言檜狗私欺君合正典刑章三上遂褫
檜職又請暴檜惡於天下從之除太常少卿兼給事中檜
復相公遂落職寓居湖州後與兄岳年隱居昌國之馬秦
山檜死復居於鄞子衡仕至湖南提舉詳延祐志
勾餘土音黃侍御馬秦山

詩話侍御卜葬其父于鄞而身寓苕上宰相惡之押回
閩中故籍侍御潛入昌國避人馬秦山中宰相死始歸
鄞 據寶慶志圖馬秦山南近桃花山北近寶陀山在
懸海中內有保寧院

四明談助 卷二十四 二
一日縱敵兮數世之憂百年爲墟兮誰人之尤奪我苕水
兮禁我福州偃月機深兮畏彼陰謀馬秦山高兮東海之
隈聊避地兮以唱以酬游魚出水兮聽我清謳飛入汴都
兮訴彼共兜飛入鄞江兮省我松楸飛入行在今斬佞臣
頭

詩註一日縱敵遂貽數世之憂百年爲墟誰任諸人之
責此周正字南仲草奪秦檜官諡勅中語也

禮部侍郎黃公宗明

字誠甫號致齋正德九年進士除南京兵部主事進郎中
武宗南征抗疏諫尋請告南歸嘉靖二年起南京刑部郎
中尋擢兵部右侍郎抗疏救編修楊名拜禮部右侍郎詳嘉

靖志子元忠字資穆歲貢士歷官岳州府通判孫順存嘉靖
戊午應天舉人聞志

先生初出守吉安下車首建白鷺洲書院以學道教諸生
宸濠遺孽朱祥阻隘嘯聚白日乘肩輿橫行城市中吏不
敢問先生潛發兵布賊舍左右候除夜牒郡從事他出猝
至其所賊方聚飲伏發立縛祥父子及其黨無一人得脫
盡斬之人謂先生計畧足方文成也

耆舊傳

黃睢寧宗欽

公爲致齋宗伯宗明之弟嘗爲合肥丞出人冤獄却其謝
金其人卽以之造舟濟人徒涉以表德終睢寧令

聞志

黃僉事元恭

字資禮號省齋睢寧令宗欽之子登嘉靖丁未進士授工
部營繕司主事內官監高忠匿工匠虛銀數萬計公疏發

四明談助

卷二十四

三

其奸幾得禍嚴嵩方擅命公疏其罪乞早竄僂以謝天下
疏已入銀臺矣尚書文明愛其才密從司禮取其疏毀之
然嵩已微聞其事遂謫判漳州稍遷南兵部郎出爲河南

僉事以事忤巡撫李遂罷官歸

詳曹志

公爲營繕時所司職與內監相關未嘗稍爲屈一日司禮
大璫以諸曹疏下公當入領故事領疏曹官旣受疏北面
揖大璫南面報揖公謂疏在若手猶可旣授我而南面報
揖何也且左順門上所常御豈爾南面地竟出弗顧諸璫
俱以強項郎呼之所著有漫遊集

耆舊傳

黃鴻臚元肅

字資安號后川少宗伯宗明從子由太學生官鴻臚丞行

善好施當嘉靖甲辰隆慶己巳郡大侵出粟賑救人懷其德所著有世綸堂集儀臺漫興

聞志

黃隨州靜存

字動亨僉事元恭長子性孝友博極羣籍以貢授湖廣隨州同知時采鑛權稅使出毒甚公曲爲調停隨稅得減三之二及卒含殮無資士民賻之其貞廉如此

知縣黃公道宏

字觀能號邁菴僉事元恭四世孫順治辛丑進士授威縣令以侍親疾乞歸終養跬步弗離憂勞成疾以卒著有烟雨樓集

黃處士道暉

四明談助

卷二十四

四

字吉光號鈍齋觀察元恭之元孫弱冠有文名力敦孝友感動隣里同邑有孤忠無後之墳在西湖處士館杭時每歲寒食必脩牲醴致奠著春秋管見橙軒文集等書門人私謚孝毅先生

黃文學道南

字北溪原字在中績學砥行老而彌篤臨歿屬其姪之傅朱書棺和曰不怨不尤居以俟無思無慮詠而歸從容如此可以想見其爲人矣著有存神集詩文四卷

黃沐陽于高

字天如號愧吾鴻臚元肅四世孫性孝友工詩文康熙戊午舉人授長山教諭以卓異特簡沐陽令沐地無界豪強

兼并而訟者比比公飭保正植柳以正疆界爭端始息所
著有太易講義禮記輯要秦漢品粹諸書以上三補
耆舊傳

黃肖堂之傳

字築隱號肖堂隨州公之元孫嘗論明夷待訪錄以爲是
固經世之文顧箕子受武王之訪不得已而應之耳豈有
艱貞蒙難之身而存一待之見於胸中者則麥秀之恫荒
矣其足以砭切古人有如此者結埼亭集有名之綺者字霞城
康熙間諸生能詩善書法耳聾以紙筆通言語與昷外大
父陳宗儒先生善篤於友誼年踰八秩終

黃僉憲第中舊有河

寶慶志云平橋河一自章耆巷橋南側西八章耆巷內今淤

四明談助

卷二十四

五

其淤河在黃僉憲甲第中南出解元橋橋以孫解元鑰居此
故名又名孫家橋東抵廣濟橋西達紫薇街敬止錄

又黃氏沔陽功廓洪武間署吏部掾有幹才先是本邑東津浮
橋置船十四巨板其上治鐵貫爲巨纜累爲颶風所壞積久
不能繕治公上疏乞增設船二隻僉民七十二戶守之授襄
陽通判政聲藉甚劾奏本郡知府貪墨歷陞沔陽知州卒於

官成化

沈相國第

縣治南廣濟橋右大學士沈一貫所居聞志今爲提督署沈氏
世傳俱列採蓮橋第二府下

提督公署

康熙八年提督自紹興府移駐郡城有司封採民房爲之曹志東西列戟爲轅門前爲大門進內爲二門爲甬道中爲大堂有御書篤忱堂樂善不倦寬惠糾桓等額奉懸正楹大堂之東曰敬事堂中奉御碑一座上書干城二字西曰西廳奉御書秉心誠悃四字進內爲二堂中奉御書重鎮二字進後正樓五間翼以兩廂二堂之東曰來紫軒西曰雙桂廳又西爲箭廳南爲箭道門門左爲賚奏廳大堂之右爲各曹吏舍二門外東爲土地祠轅門左右爲文武官候廳浙江通志提督統水陸師

國初提督駐劄省城順治十六年移駐寧波康熙元年另設水師提督一員駐寧城移陸師提督於紹興府七年裁水師

四明談助

卷二十四

六

提督仍移陸師提督駐寧統水師曹志

浙江提督田雄

宣府人明季降臣以獻主功授浙江提督順治初年任

田子慘死記王无界屋山集

禪僧大通者慤實進修人也每夜分擊木板高聲念佛響徹天半周行寧郡城中警策人士人士多敬禮之日投錢米不倦癸巳某月某日夜忽途遇猙獰卒數百人中擁一人被欽拳五刑鞭箠雹下流血漬面以爲囚也駭避而竊視之則逆賊田氏子也心疑異不釋頃間將旦及帥府門前則田氏子傳於五夜氣絕矣逆計所遇正是時也告於所知喧傳一時先是田氏子病篤出牲玉走望以哀丐餘

生人意其或不免嗚呼豈有背絕天道如是而不受尸磔百慘者皇皇者天沉沉者地徼倖曲恕以圖考終奚能乎至是聞楚痛狂呼號泣吐血而殞人猶恨之以爲是仍完身首死兒女子纏帛中非天道也嗟乎又烏知天道之用別有元奇非人之所得揣耶又烏知此日之痛號非司命之磔其身而人自不見耶又烏知司命者正恐人不見其尸磔以爲似乎考終而故於中夜禪僧之一見以告人使知亂臣賊子不殺於陽必殺於陰有如此之昭昭不赦赫赫可畏耶且使他人見之他人言之或以疾惡之故造爲此說未必遽信而故使禪僧之夙爲人所敬禮者見之而言之以使人之信而不疑耶嘗見讀史者凡見前代逆惡者皆以田氏子爲準也是何可不記之以使天下後世之張目也

張提督杰

遼東人明季降臣康熙元年任浙江提督以擒張蒼水有功別無善政非海道王爾祿可比後入名宦祠有一鄉老先生見之憤甚擲其主於泮池

浙江提督吳公陞

字源澤福建泉州人康熙二十一年從大帥攻彭湖先登

陷陣錄首功尋晉提督兩浙清儉自持嚴於馭下非沍寒
盛暑不廢簡閱所給月餉必均故士雖勞不怨遇有生事
者痛加懲革自是兵與民馴若同室故事冬夜扞擻恒派
舖戶輪值公謂窮民少重衾育兒女必解衣均覆遣之出
外舉家忍凍何堪兵取衛民戢盜固其分也遂飭營弁守
夜夜分常親行隘巷以警其惰故終任少穿窬之警及調
閩省聞寧郡歲饑泛巨艘運米以濟其加恩去後又如此

曹志

蒼提督保

號燕山旗人嘉慶三年任浙江提督性廉介却絕苞苴統
轄全省靜以鎮之一切軍務能以真心體貼喜讀書工書

四明談助

卷二十四

八

法結搆渾勁人有求書聯額者欣然立就雖居武職綽有
儒臣風度

公苗姓世爲旗弁嘗語黃東井曰吾姓非苗也祖上爲
鎮江都統有故明忠臣張氏者其子執於鎮江祖上憐
其忠密爲娶婦生子而以爲己子以至於今吾張氏也
東井聞此語筆於蒼公傳後以爲世傳蒼水有孫存於
旗下其言猶信

萬總兵衙

縣治南沈大學士第之右都督萬邦孚所居

聞志

康熙初採爲

提署箭廳萬氏子孫聚居管村墳莊後又遷於湖西全侍郎
第之左充宗先生斯大寓杭講學以守鹿園公墓定居於杭

磁州牧承勲別建第於小教場後屠家灣

萬氏家乘序 節 杲堂文鈔

余嘗讀宋文憲公記鄭仲涵事言仲涵奔走兵燹中人見其袖二書以行未嘗少離及事平還家取而視之乃宗譜家範也卽爲肅然良久以是知家乘一編人盡當敬守之史官每卽其所自論載錄爲列傳如前後漢書所述兩司馬楊氏班氏傳多本所自序涑水記李鄴侯相畧盡採其家傳此尤最著者則雖家傳而仍副在太史豈不益重哉里中萬充宗吾友悔菴先生之第六子也近輯其家傳哀然成書以問序於余余更肅然曰充宗此書整齊三百年世德可謂知所重矣若以史傳例論之其當爲史官所錄凡四蓋高皇帝開國功

四明談助

卷二十四

九

莫大於復燕而萬氏一世祖明威將軍諱斌以從大將軍北征死於陳其後禍莫大於遜國而二世祖諱鍾以禦北平兵死之大下既定惟交趾數反而三世祖諱武戰陷交趾中倭奴數擾海上爲東南患而武弟諱文以哨海射中龍目沒於水則自開國後數十年國家有大事萬氏皆有一人死之血戰萬里頭行骨飛俱不得以馬革裹尸還葬此其三世四忠當爲合傳者一朝廷所仰給恃在東南輸輓而萬氏第八世諱表以舉於鄉起家爲大將數督轉漕前後所上奏議數十俱著爲令公將畧與戚武莊齊名而身被儒服儒行雅歌論經學者稱鹿園先生其後子孫相繼爲大將凡三世當爲合傳者一前此萬氏世襲官指揮使至十一世諱泰始以通經

舉孝廉其文行爲天下模楷卽所謂吾友悔菴先生者也先生風格比東漢郭有道黃徵君當爲專傳者一自二世以後死國事者三人俱年少其夫人盡勵冰操稱三節而射龍將軍死後遺腹得男將軍有女弟曰義顓因念萬氏門祚衰遂不嫁守孤兒成立著丈夫服七十餘年事更奇當入列女傳者一蓋萬氏自定遠徙家無他萬於鄞所傳十一世俱其大宗而應載史傳者至十二人輯其遺文前事藏諸草堂以俟異日史官斯眞賢子孫之事也余嘗過萬氏觀其歷世圖像及吳元年所賜一腰符萬戶侯告身一道上有高皇帝御押點縱如發千鈞之弩爲竦然下拜而萬氏子孫多能言其先世戰功與所歷山川轉鬪處飄風奔沙靈旗放悲射龍將軍

四明談助

卷二十四

十

乘怒馬出沒灌門戰洋間精響如在以至鹿園公解大將印歸栖心妙道死後人復見之名山中皆傳其仙去而悔菴先生爲世所宗凡與名士往還筆疏妙天下諸可驚可愕可喜可觀俱一一能道之猶慮奕世而後或有遺忘因經年綴集已成此書試一披卷間卽知其先世死國事者在某朝起家爲大將者在每朝以舉孝廉名世者在某朝由是俯仰唏噓使忠孝之念勃然而並生卽今日開府故第已爲廐庫馬通塞其門而尚得聚家丙舍之中卽一褐衣一糲飯誰非先人所貽攀墓門松柏霜皮黛色誰非先人所植以此興感雖在百世子孫猶當慨然若身見之矣充宗下筆老健諸纂集俱出一手細書成帙謂倉猝可攜之而行此其意與鄭仲涵絕

類使生與宋文憲同時當更序其書矣

萬指揮明初賜第在鑿橋卽方氏第二府萬氏族望表并四忠傳俱見賜第下第八世都督表建第於新街五世至九世傳見都督第下第十世總兵邦孚建第於此今爲提署箭廳十世以下傳俱列後

都督僉事萬公邦孚

字汝永號瑞巖參將達甫子鹿園先生之孫也少爲諸生不耑守一經已襲爵指揮凡三領漕最有名遷山東都司僉書入衛值三殿災公率三千人夜從大司馬救火上命毀五鳳樓以保承運庫公曰樓爲國家象魏不可撤臣請併力衛庫乃令軍士各持濕絮被覆屋運水灌之樓得並

四明談助

卷二十四

十一

存萬歷二十六年會征倭援師敗績朝議授公遊擊以南京龍江水師屬公守鴨綠江通餽運晉參將再遷以都督僉事總福建兵修戚武莊遺法壁壘一新未幾聞有營求其地者遂引疾歸里築數椽糲食日與諸公觴詠爲娛卒年七十五所著一枝軒稿行世

詳耆舊傳

從弟邦寧字惟咸能

詩文善書法

曹志

萬氏自都督以上以忠節顯者三世自總兵以上以儒術顯者又三世明州萬氏無愧爲國家之世臣矣北都失守悠悠之口皆謂不任武臣所致不知自古兵柄本出儒術思陵矯枉重武其所重者皆粗暴之徒君死社稷免胄入賊師者無一人焉荷戈衷甲反爲賊用此專任武力之過

也今觀萬氏有事則顯忠節無事則顯儒術皆卿相之才
有鄉相之才而爲武亦猶威寧新建有將帥之才而爲文
也以武夫而謂之武無乃以場屋委瑣之士而謂之文乎
嗟乎名實之亂久矣此世之所以受魚爛之禍也

南雷文定

孝廉萬悔菴先生泰

字履安號悔菴都督邦孚之子其先以勳衛世其家至先
生始舉崇禎九年鄉試與里中陸文虎同研席並以風格
自高有文名時稱萬陸國難後先生杜跡里門江干義師
起文虎出爲行人先生亦授戶部主事不受大兵渡浙先
生遁跡榆林時遭太夫人之喪倉皇卒事凡先世書卷青
氈之在榆林者蕩於兵火文虎復死先生慟哭于野一病

四明談助

卷二十四

十二

三年炊烟屢絕形廢心死然聞高中丞斗樞父子李儀部
桐父子犯難繫獄先生猶密爲籌畫得釋黃晦木已赴市
復以奇計出之當是時傳先生義聲人爲震動嘗一客嶺
外舟還至南安有同年生毛汧病疫幾死舟人俱欲棄之
先生不可身爲調藥餌時其起臥汧得生而先生遂病不
起其篤于友誼如此先生負經世之才三上公車不第而
終於溷跡江湖羈魂飄泊斯足爲先生惜然自兩都既覆
剖符子孫淪失草莽幾不可復問而先生有丈夫子八人
恂恂孝謹多能傳先生之學斯其足爲先生慰爾

詳見南雷文墓

志著有續騷堂集杲堂爲序集外又有寒松齋集粵草皆

遭亂以後之作

跋續騷堂集後

鮎埼亭集

萬戶部履安在復社中甬上四孝廉之一也丙戌後文虎早逝時有七孝廉皆謝公車而次公節最高履安天鑑次之卽四孝廉之三也履安與謝氏婚乙酉之役諸公欲殺謝氏履安救之及戊子諸公爲謝氏所殺履安力不能止遂以此大不理于口然履安亦甚自悔故以悔名菴其後始稍原之林太常繭菴貽書董隱君曉山言春秋責脩賢者固當然不可沒其補過之心可謂平情之論適予選甬上耆舊詩特爲著其事此事固不必諱也

萬隱君斯年

字祖繩號澹菴悔菴先生長子也少從錢忠介公學忠介

四明談助

卷二十四

十三

高座弟子君爲第一俄逢喪亂劍戟弧弓紛然遍于城市居民惴惴無不閉門聽難而君讀書不輟伊吾之聲達于戶外家人共止之暫息而復作以此尤君不恤也避地屢遷家具盡棄悉載其書卷以行晝則偕老雜作夜則擁書集子弟雜誦講解非雞鳴不止篤于好學如此君于三黨皆有恩意忠介死於海外收其文集又爲之立嗣師門之誼非常人之所及

詳見續耆舊傳

兄弟八人次斯程力學攻醫四

斯昌負才早歿

曹志

萬隱君斯禎

字正符悔菴第三子孝友性成著有易解旁治毛詩春秋

曹志

萬布衣斯選

字公擇學者稱白雲先生戶部泰第五子也亂後隱居不試梨洲黃氏講學甬上其稱高座者十有八人然或講經或權史或爲詩古文詞而先生以躬行君子領袖之嘗謂學者須語語驗之躬行方爲實學於是切實體認知意爲心之存主非心之所發理卽在氣中非理先氣後論者以爲蕺山眞血脈蓋萬氏自鹿園都督以來世世講學然皆雜以機鋒至先生而體認深密所得大醇及其卒也梨洲哭之慟謂甬上從游能續蕺山之學者惟斯選一人不啻陽明之悼徐愛也著有白雲集

詳見續者舊傳

續耆舊集寒松齋詩選引萬戶部八子並有才當時有高

四明談助

卷二十四

十四

陽里之目而第五以下四人尤勝曰白雲五先生斯選曰褐夫六先生斯大曰又菴七先生斯脩曰石園八先生斯同杲堂嘗曰粹然有得造次儒者吾不如萬五好古而信篤志不紛吾不如萬六學通古今無所不辨吾不如萬八而萬七雖爲予壻其詩律之工吾且出其下可謂盛矣

萬布衣斯大

字充宗號褐夫履安先生第六子也生逢喪亂不爲科舉之學湛思諸經以爲非通諸經不能通一經非悟傳註之失則不能通經非以經釋經則亦無由悟傳註之失會通各經證墜緝缺聚訟之議渙然氷泮所爲書曰學禮質疑二卷周官辨非二卷儀禮商二卷禮記偶箋三卷初輯春

秋二百四十卷燼于大火復輯絕筆於昭公丁災甲陽草各一卷其間說經者居多萬氏家譜十卷君爲人剛毅見有不可者義形于色其嗜義若饑渴張蒼水死國難葬之南屏春秋野祭蓋不異西臺之哭焉父友陸文虎無後兩世之喪皆在淺土君葬其六棺凡所爲皆類此南雷文定墓志初纂春秋說既不戒於火後補輯全書時有心得者另爲劄記共十卷名曰學春秋隨筆因以別行而全書則不可復

得矣

浙江採書錄

先生嘗欲輯魏雪竇之遺集會卒不果其子經卒成之蓋不愧謝臯羽許劍之期者也嘗遊杭之玉龍山見有張紳彥神主擊而碎之廟祝驚怖先生謂曰此故明兵部尚書

四明談助

卷二十四

十五

降流賊今爲浙中方伯者也如有問者但言我實爲之所著丁災甲陽草焚于火續者舊傳

萬布衣斯脩

字允誠一字又菴戶部泰第七子也亂後隱居不試壻于李氏婦翁杲堂先生愛之相依二十餘年如左右手昕夕互相唱和杲堂嘗有詩曰偶然題得驚人句爲喚吾家萬楚商及輯甬上耆舊詩先生搜訪之功最多篤于兄弟之誼晚年束脩之入粗治數椽均之于長兄之子管村所著

有深省堂集

詳續者舊傳

貞文先生萬斯同

字季野又字石園戶部泰第八子也少不馴弗肯帖帖隨

諸兄諸兄亦忽之戶部以其頑閉之空室中先生竊視架上
有明史料數十冊讀之甚喜數十日而畢又見有經學
諸書皆盡之既出因時時從諸兄後聽其議論一日伯兄
斯年家課先生欲預焉伯兄笑曰汝何知先生答曰視諸
兄所造亦易與耳伯兄驟聞而馳之曰然則吾將試汝因
襍出經義目試之汗漫千言俄頃而就伯兄大驚以告戶
部曰幾失吾弟戶部亦愕然是日始爲先生新衣履送入
塾讀書踰年遣請業于梨洲先生則置之絳帳中高座康
熙五年甬上有講經之會羣疑一言立解十七年 詔徵
博學鴻儒浙東巡道許宏勳以先生應力辭得免明年開
局修明史大學士徐元文延先生往先生請以布衣叅史

局不署銜不受俸許之元文罷繼之者大學士張玉書陳
廷敬尚書王鴻緒皆延之凡諸纂修官以稿至皆送先生
覆審先生閱畢謂侍者曰取某書某卷某葉有某事當補
入取某書某卷某葉有某事當叅校侍者如言而至無爽
者明史稿五百卷皆出先生手定先生之初至京也時議
意其專長左史及崑山徐侍郎乾學居憂固請先生纂讀
禮通老一書上自國恤以迄家禮十四經之箋疏廿一史
之志傳漢唐宋諸儒之文集說部無或遺者又以其餘爲
喪禮辨疑四卷廟制折衷二卷乃知先生之深于經侍郎
固請先生編成五禮之書幾二百餘卷安溪李厚菴最少
許可嘗曰吾生平所見不過數子顧寧人萬季野閩百詩

斯真足以脩石渠顧問之選者也先生爲人和平大雅而其中介然不矜意氣不事聲援尤喜獎引後進惟恐失之于講會中惓惓三致意焉蓋躬行君子也卒後門人私謚曰貞文續者舊傳

先生自以故國世臣不欲出仕而有志於故國之史故出而秉史局之筆七年其後部帙雖累易然莫能出先生之底本者蓋先生之置身在陶南村一流而所學則過之彼東澗老人受恩四朝覲顏二姓自託于國史而爲言者能無愧死傳後論

貞文先生著述書目

周正彙考八卷 讀禮附論一卷 石經考一卷 聲韻

四明談助

卷二十四

十七

源流二冊 補歷代史表六十四卷 歷代宰輔彙考八卷 歷代紀元彙考四卷 廟制圖考四卷 南宋六陵遺事二卷 庚申君遺事一卷 宋季忠義錄十六卷 明代河渠考四卷 河源彙考四卷 書學彙編十卷 儒林宗派十六卷 羣書疑辨十二卷 石鼓文考四卷 石園詩文集二十卷

明史稿三百卷讀禮通考一百卷二書在外

翰林萬學使經

字授一別署九沙充宗先生子也萬氏自都督鹿園公表葬於杭之西溪及充宗先生開講於杭遂以守墓定居故公長於杭少隨諸父讀書南雷黃子方移證人書院於鄞

申明蕺山之學公侍於席未豫聞其教又叩性理之學於
應徵士嗣寅謙求漢隸原委於鄭君谷口 參攷通鑑地
理箋釋于閻徵士百詩若宜其博且精也公成康熙癸未
進士選入翰林尋授編修主山西鄉試預修康熙字典督
學貴州及報政還京忌者中之遂有通州修城之役公賣
產以應家靡剩遺晚年修寧波府志又續輯其父禮記集
解春秋明義二書杭城大火燼焉遂抱恨而卒著有尚書
說續纂明史舉要重修歷代紀年分隸偶存等書子承天
雍正己酉拔貢山西孟縣知縣承式康熙甲午舉人四川
萬縣知縣結埼亭集墓志
參萬氏家傳孫福歲貢生後改籍于杭至今
科第不絕

四明談助

卷二十四

十八

萬五河言 萬磁州承勳二傳錄于屠家灣新第下

董給事宅

在紫薇街東門對萬總兵衙明殉難給事中董志寧之居
甬上族望表南湖董氏宋修武郎之邵之後也進士恭禮殉
難給事中志寧共二望

董孝子墓攷

結埼亭集外編

吾鄉董孝子墓卽祔于其母淑德夫人墓旁舒嬾堂詩所謂
孤豕枕城邊者也近世慈谿之董氏指其縣中羊酪河所稱
董孝子墓以爲徵君故塋鄞之董氏亦從而祭之不知此乃
明洪永間別董孝子係奉化建炎義士董之邵之後數傳而
爲閣學仁聲又數傳而爲孝子諱恭禮自奉化遷鄞成洪武

辛未進士以母老歸養不仕母卒值革除又託廬墓以終土人亦以孝子呼之明末之給事中志寧其裔也不學之徒妄祀非族故爲正之

董義士之邵

奉化人宋建炎三年金人寇明州義士同李侗任戢率鄉勇千餘人保奉化城三戰於泉口金人不能入而退事詳郡志

董進士恭禮

鄞人登洪武辛未進士未授職以母老乞終養歸尋遭喪會成祖卽位家居不出以終

曹志

殉難給事董忠節公志寧

四明談助

卷二十四

十九

字幼安宋義士贈修武郎之邵之後之邵孫仁聲官至殿閣三傳而爲明進士恭禮公之八世祖也曾祖總祖宰父僎萬歷丁酉舉人之副公由諸生食餼貢太學以名節自勵乙酉六月大兵長驅入浙公徧謁同里薦紳勸以起兵聞者皆笑以爲狂獨刑部員外郎錢公是之顧其事莫能集後聞餘姚兵起會稽亦應之然猶相顧莫敢主者最後錢公力疾至請獨任之而故太僕卿謝三賓家富耦國新從江上迎降歸惡聞其事定海總兵王之仁亦以迎降得仍舊任者也三賓乃貽之書曰滄滄訛訛出自庸妄者之口將軍以所部來斬六狂生事卽解矣六狂生者陸公宇燝張公夢錫華公夏王公家勤毛公聚奎而公其首也

會錢公亦有書貽之仁之仁中悔致書錢公請自効翌日率所部至大會鄞人于演武場三賓不知也揚揚來赴以爲殺六狂生在頃刻坐定之仁出其書朗誦責之三賓欲奪其書之仁怒麾軍士令斬其首以祭纛三賓叩頭乞哀請出家財充餉乃止一軍股栗監國次于會稽授公大理寺評事視師瓜里而三賓亦至會稽假勸輸義餉之名乾没里中軍需公惡之棄官歸甫一年江上師屻三賓復降踰年而有五君子之禍是時浙地盡歸版圖祇舟山石浦未下 大兵亦置之不以爲意而航海之軍至長垣連陷閩海州縣且逼福州于是 大兵之脩浙者頗抽以脩閩殘明遺老始稍稍于浙東山中結寨拒命而李公長祥王

公翌兩軍爲主盟公與華王諸公計以王公軍下寧波而已翻城應之因連李公軍以下紹興監國故疆可復也華王諸公皆喜馮公京第聞之請以舟山之軍來會刻日部署已定復爲三賓所謀知發其事四出搜捕五君子皆遇害公獨逃之舟山得脫監國旣至舟山遷公兵科都給事中時時奉使入內地聯絡山寨諸軍以爲海上策應辛卯舟山失守公自刎死公以倡義首事卒以一死謝之可謂與魯存亡者也妻羅氏子士駿士驤方公初入舟山時天朝捕其妻子有義僕文周匿之赴官受拷垂死不言得免華公在囚中作泗水鼎樂府紀同難事首褒之其羅孺人聞公訃仰藥而卒而士駿兄弟育于高公宇泰家及長

卒承先志蹈海不返文周悼公祀之絕也遂以縞素茹蔬
終身一門節烈之盛古今希有云

結亭琦
集墓志

乾隆四十一年

賜謚忠節

墓表後段云嗚呼公之志則烈矣然吾見督師集中有和
聖思軍中思親詩則知其時公尚有親也君父良難兼顧
但公以環堵書生未嘗受國恩而必棄其親以從君斯亦
不無小過是時如彤菴簞溪蒼水嘿農楚石及管江諸杜
皆以篤老之親因抗節而有所不顧揆之聖賢之處此未
必其然斯亦論世者所當知也然而大節如諸公要不可
泯沒公之死幾百年同里萬君承勳感公之節爲之徵文
于予而勒諸石

四明談助

卷二十四

二十一

句餘土音擬薤露詞

嗟郎君

文郎茹素

奴爲郎君幾烹醢豈意郎君終蹈海郎君死足見阿爺其
如奴淚從誰灑嗟哉香火不可延郎君隨爺星漢間麥飯
藜羹終奴殘年

詩話董給事幼安之元隨文周匿給事二子擄掠備至
而卒不言給事二子長成卒成父志蹈海而死文周傷
給事之無後也茹素以終其身

董給事柩歸葬于城北馬公橋有見夢于陸觀察周
明補足指事并句餘土音董給事歸魂詞俱見城北

古蹟下

游仙廟

游仙廟分祀唐秘監賀公其碑記里人葛世振撰見邑志

紫薇街

以余氏紫薇坊名

南通均奢橋北通平橋其街甚闊明朝一代旌表石坊多建此街今街兩旁巨室變爲零星小戶或雜作舖子販客往來搖鼓吹簫鳴鈺擊析朝夕不斷石坊四柱半藏居民屋內非復舊觀

三鳳坊范氏

范潤 天順甲申進士南京兵部車駕司主事

范槐 宏治乙卯舉人山東平度州知州

范棫 正德癸酉舉人江西饒州府知府

四明談助

卷二十四

二十二

范祿 正德甲戌進士廣東廣州府知府以覲典入朝與同邑王相等爭大禮受杖不復出仕

范秉元 嘉靖乙酉舉人 俱見鄞獻表范祿傳見聞志

紫薇坊余氏

甬上族望表河南布政使麟子陝西布政使洵二望

布政余公麟

字天祥永樂癸卯舉人歷陞儀制郎中有言襲封孔子非嫡系欲奪之命往勘公曰聖人襲爵非一世嫡庶誠難辨倘勘不實將何據以易之遂不果奪官至河南左布政使

詳嘉靖志

余布政洵

字允清布政麟子也舉正統戊午順天鄉試歷刑部郎中
出爲福建按察副使改湖廣復改陝西陞本省右布政使
敷歷三省大著賢聲其在荆襄時會都御史項忠都督李
震收捕山賊濫殺竹山諸縣流民監軍張寬復謀發兵搜
捕要功公與之忤乞致仕詳見嘉靖志

余學博杲

字懷明布政洵之子以貢授常州府學訓導躬先率士人
重其能世傳家學嘉靖志杲子佑廣西遷江縣知縣族克承

天啓辛酉舉人鄞表

菜園廟

在提署後章耆巷向係沈相府內菜園之神自相府改爲提

四明談助

卷二十四

二十三

署遷廟於此今稱財神殿

童元戎第

在都憲橋西松江提督童振聲之宅道光初 內陞侍衛直

乾清門現在 予告家居

千歲坊李氏

明工部侍郎兼都御史李堂自孝聞坊遷居平橋河南隔河
卽千歲坊鄞獻鄞表稱千歲坊李氏宅北有光祿橋南有都
憲橋俱以侍郎得名又有第在大梁街見聞志李氏世傳俱
列孝聞坊舊第下

曾家滙

寶慶志云曾家滙橋在章耆巷橋之南南通廣濟橋敬止錄

云予舊居東應爲曾家滙永安橋在滙北廣濟橋在滙南據此說滙頭卽市中心橋知西來水俱繞滙出萬壽寺橋歸大河爲府治第一重下沙

南湖頭

按寶慶志迎鳳坊稱南湖千歲坊稱南湖頭蓋自平橋起西至三版橋河月湖十洲環於內爲月湖盡處平橋以東至千歲坊河其水自棒花橋來爲日湖盡處也故曰南湖頭

四明談助卷二十五

錫山脉進城第四條沙爲府治正朝已錄於前茲再從冷靜街東行自捧花橋過河至龍舌尖其水兩分西接蔣園廟河來水轉北出普照橋新橋握蘭橋廣濟橋合平橋河來水轉東同出市心橋再轉北至廣慧橋柴家橋直出蕭家橋入大河東出捧花橋轉北出王監橋磚橋天封橋福明橋新排橋洗馬橋泰和橋直出隱僊橋入大河此爲府治第五條朝沙其地勢南銳北豐兩河之間自龍舌尖起以次而北至大界河止爲街巷者七遞詳於下

龍舌尖

地取形似亦稱三角地分水起於尖角北行街亦隨水北行

四明談助

卷二十五

一

東盡於舊縣治前開明橋西水盡於今縣治前蕭家橋西街盡於貫橋兩街放開相距一里而入首甚尖豎起如塔故聞志有地塔之說

湖語伊平遠之流泉忽有時爲周髀之合妙一股與一勾竟參三而鼎立而且極神奇之巧幻又如南箕之翕當其忽焉而申疑雲氣之可接也

三角灣舊名龍舌

紡絲巷第一

東達磚橋西達普照橋其上有磚橋廟紡絲局南湖余氏等蹟

磚橋廟

在縣治南相傳神姓張唐時爲邑丞督建天封塔運磚之民

德之立祠祀焉錢志

紡絲局

吾鄉自唐至宋皆貢綾唐國要圖云貢交梭綾貞元十道錄云貢吳綾元和國計圖云貢吳綾白附子宋九域志云貢綾一十四匹寶慶志云歲貢大花綾一十四匹深寧先生七觀亦誇交梭吳綾之精鄞之南湖舊有紡絲織紗諸巷殆卽貢綾時所呼蓋杼軸羣聚之地而後遂沿其名耳

結埼亭集

結埼亭集詩吾鄉布帛最寥寥一絕再紵三越葛次之枯竹桿草褐鴉青棗紅亦佳物未若吳綾誇獨絕大花璀璨狀五雲交梭連環泯百結濯以飛瀑之赤泉蜀江新水不足埒浹月四十有五紅上爲黼座補袞闕女野光芒燭帝室一自楊

四明談助

卷二十五

二

使君惠民請改折年來林村產報章笑下劣空傳古巷名紡絲絡緯蕭條不足述吁嗟蠶績已日拙

湖語若夫吳綾七襄載在方物紡絲巷中中宵兀兀擬之蜀中文君縑帛交梭之名百縑不易夏日所需厥有輕紗比之薄羅微涼足夸前代所云冰紈方空縠綸吹絮未足多焉是則女紅之精者也

南湖余氏

通政使余本故居新第建於醋務橋傳見新第下

壽昌寺巷第二

東達天封橋西達白華菴橋其上有壽昌寺天封朱氏祥符廟白華菴等蹟

壽昌教寺

宋乾道五年建蓋東壽昌之子院也先是唐清泰二年建東院於天慶觀之東宋大觀二年賜額壽昌而子院因以西壽昌名嘉定十三年東西二院俱燬民乃居其趾淳祐元年僧慧通別建菴於西城外揭以壽昌舊額元至元二十五年詔天下廢寺復舊時東壽昌無僧可復於是慧通之徒志堅重建西壽昌於城中東南之故址歸其遺額博士陳著有記明洪武十五年定爲壽昌教寺永樂二十一年住持行恢應召歸建昭恩閣太史宋琰爲記宣德四年恢重建殿堂大司成陳敬宗爲記其後屢圯屢建 國朝康熙十五年等雲募建山門照牆住持恩璿節次重修佛殿廊宇裝飾大佛諸像定

四明談助

卷二十五

三

成叢林

詳聞志

應召法師行恢

字復宗生而穎異隆頂脩鼻居壽昌行高學博永樂四年應召陞對稱旨命同修文獻大成十六年復應召命較大藏經典既而又召預修永樂大典示寂後建塔於南郊甬水橋畔之歸津巷

詳聞志

壽昌悟留謹法師

悟留歸依釋教兼習於詩有雙青集詩稿東洲遺老爲之序見杲堂文鈔

殿後古槎

聞蕊泉古槎記畧吾鄞壽昌寺有浮槎天啓初元辛酉西

村王氏來施相傳是歲大雷電以風蟄龍從窻谷起大樹
盡拔石圻崖崩槎浮澤流與龍俱出歷溪澗江河迅於鬢
鼓越日王氏乘急湍放桴抵中流熒熒光發而槎隨桴至
衆咸驚異王氏老輩名之龍者夙好佛與妙如大真禪師
善語衆曰此數千年神物非覺海不航非慈雲不臥時妙
如住壽昌興建新成因奉槎安寺迄今四十有六年而辛
酉正余初度之歲也余交菊窻於石二上人每過從周視
摩抄謀構亭以妥之其高十尺有奇孤根卓立身合抱頂
岐體累累螺旋巉巖突兀爲節者不可勝數大兒嶧桐小
兒錦柏形已槁心未灰豈惟長笑秦階卽博望亦不屑與
偕焉余客歲訪囊雲周先生於剡川之小盤谷瓢中有雲
扶餘爾雲樹

東隱堂古柏

在壽昌寺西偏東隱二字張卽之書

國朝周容爲賦

聞志

羅漢畫

壽昌寺十八羅漢畫像崇禎初謝象三知嘉定縣時聞杭
州長明寺有貫休畫十八應真墨蹟請名手李次公臨摹
得之復請婁子柔寫蘓長公十八贊於每幅之上欲留供
嘉定僧寺不果遂攜歸於延慶寺造寄園供之鼎革後園

亦廢象三之孫爲憲以大父嘗塑羅漢像於壽昌寺因以畫像供養寺中時丙午歲四月八日距子柔題識已三十年矣謝象三歿後孫爲憲題識其上屬主僧寶藏勿失

焉日湖訪古錄

定香菴

舊在縣治西南古白檀寺旁今建於壽昌寺後西通清潤坊天封橋朱氏

天封橋舊名文博橋朱氏之先有名元吉徽之婺源人宋南渡隨蹕至臨安後官明州提領卜居海濱之金塘山至明初時徙金塘居民實郡城因家於郡之文博橋至第四世仲容仲莊相友愛永樂元年仲莊代父戍雲南在鄞者皆仲容之

四明談助

卷二十五

五

後由壽昌寺至祥符廟一帶聚族而居

朱氏宗譜

善行朱先生源

字本卿號澄溪提領八世孫性洞坦好儒術多積經史以訓子孫而孝友則其天植者也諸善行見聞志

善行之孫勲松江同知燾監察御史曾孫陞休寧知縣維墉欽天監博士基昌淮安同知松江之父藩幕應桂由天封橋西分居于橋東松江於萬歷丁酉發科樹旗表閭又建新第五岳軒於王家墩藩幕支派下諸傳俱列於王家墩新第

朱文學墀

號華嶠提領九世孫應樑之孫父黯字養明邃志學業手

著易說一編爲人傳誦至老不得一衿縱酒自放遂致兩目俱盲

朱氏家傳

華嶠得其家學於易理最深爲人孝友謙厚

詳聞志

朱徵君金誥

字宸宣文學墀之子母病醫禱無效老僧告以刺指血書梵典病果瘥父疾篤復刺臂血繪大士像父亦愈兵亂負母避葛氏破屋更深虎排闥入徵士以身蔽母虎目光爍然環視臥榻而出會恩例孝子被旌者受官徵士以母老力辭

詳曹志

朱孝子世燿

號青霄諸生徵士金誥之子乾隆九年以孝行旌表建

四明談助

卷二十五

六

坊

詳錢志

雍正間分巡道孫公命鄉士募修天封塔孝子爲

首事有功

朱氏譜

天柱山房

天柱山房博士嵩華公別業假山喬木方池曲磴頗極幽致常延名士與叔輩讀書其中其後獻臣兄弟偕范子香谷董子佩公叔氏啓先解經作文數年頗獲其益

探獻臣記

此園在石柱橋東藩幕新宅之後方池古柏銀杏樹尚

在今歸于董奉直元中爲別業

董奉直元中名樞謹守祖業家日以隆例授奉直大夫自奉甚約而義所當爲不少齊乾隆戊辰乙亥鄞邑歲饑率先捐賑前後累千金課子姪嚴切尤隆禮于其師所

推解者無倦志子灼邑廩生燦國學生見東井文鈔墓誌子灼

字曉山道光乙酉舉人董氏多武科奉直族叔步雲乾

隆戊子武舉瑞安協游擊署瑞安協從兄廷彪戊申武

舉嚴州千總從弟開元嘉慶辛酉武舉早卒廷樑辛酉

同榜武舉紹興協千總奉直之姪藜庭芸軒克敦善行

尤衿惜貧士

狀元坊

在天封橋下寧宗嘉泰二年爲狀元傅行簡立時姚穎袁甫

皆大魁天下稱三傑寶慶志

祥符廟

崇福寺周廣順元年建宋大中祥符元年賜額祥符嘉定十

四明談助

卷二十五

七

三年火廢爲民居寶慶志寺廢而里人適立社於河西稱曰祥

符廟

白華庵

菴在壽昌寺西瀕河結佛閣數楹蝸舍清幽貝魚寂靜門額

爲朱徵士世燿所書酷肖張樗寮筆意

新寺大街第三

卽郡廟街東達福明橋俗稱石柱橋西達新橋其上有太平興國

寺古藥師寺元帝師殿今改郡廟有握蘭坊宗室趙氏宋皇

親宮清潤坊明邵提學第等蹟

太平興國寺

東南隅新橋東唐開元間建號太平興慶宋太平興國八年

賜今額有子院三曰浴院曰藏經院曰教院先是福明橋側
水中有泗州像時見景光好事者没水求之長尺許因加嚴
飾崇奉於寺嘉定十三年火民多占居延祐志

藥師院

在太平興國寺之右寶慶志明洪武初改剏爲城隍廟按此一

帶右有古藥師寺太平興國寺藏經新寺左有景福寺敬止錄

元帝師殿

元西域胡僧八思麻知緯侯佐世祖忽必烈定天下制蒙古
字書以七音爲本特定一代之文封爲帝師既卒令天下郡
國皆立帝師殿其制一同文廟延祐六年剏殿於藥師院故
址以奉之後遷蒙古學其中敬止錄

四明談助

卷二十五

八

府城隍廟

古者諸侯既立社稷又爲國立五祀曰司命曰中霤曰國門
曰國行曰公厲鄭氏謂國門爲城門則今之城隍是也聘禮
使者必釋幣於門而後行可謂重矣府城隍在子城西南五
十步梁貞明二年刺史沈承業創建俗傳神姓紀名信漢高
帝死事之臣也宋嘉定九年守程覃奏賜廟額曰靈佑寶慶志
洪武四年春廟災郡守張琪徙建於握蘭坊元帝師殿址時
定制凡嶽鎮海瀆並去其前代所封年號止以山水本名稱
其神明州易名爲寧波乃正神號曰寧波府城隍之神正統
三年守鄭珞重修十年守陸奇肖像郡人黃潤玉爲記開志
鄞江城隍之神開慶志則以爲漢初之紀將軍信其殆如奉

國軍譙樓祀唐睢陽六忠之例監宋高宗航海時崇祀以勵臣節者乎近忽傳故太保閣學忠介錢公嗣其任一時遺民皆爲歌詩以紀之夫錢公初倡義時六狂生擁之而出布衣戴少峯奮臂一呼衆人雲集在斯廟也徘徊神宇溯當日指麾光景如或遇之則其降神於斯也亦宜

鮚埼亭集錢公降神記

宗室趙氏

甬上前族望表宗室握蘭坊趙氏太師郡王善湘所居也父子皆以史氏之親被物議然而太師豫平李全之功侍郎汝楫有經學終當各別爲二望

趙觀文善湘

字清臣父不陋從高宗渡江聞明州多名士徙居焉觀文

四明談助

卷二十五

九

舉慶元二年進士知建康府李全犯淮東加江淮制置使許便宜從事趙范趙葵進取選諸子屯寶應以從范葵亦讓功督府善湘季子汝楫史丞相彌遠壻也故奏報無不達官至觀文殿學士致仕卒

宋史本傳

汝楫官至戶部侍郎卑退自修精易象有易叙叢書可傳晚歲以理財進用失士譽湖語云侍郎翩翩夢吞三爻更有叢書足比清瑤持計則失談經則豪宋注虞翻初立易傳奏曰郡吏陳桃夢臣與一道士布易爻撓其三爻以飯臣臣乞盡吞之道士曰易道在天三爻足矣

趙氏先後登第者一百十三人中有以品行著者湘州教授敦臨字芑民少入太學見楊龜山于京師得其指教著述最

富魏文節杞汪莊靖大猷皆其門人也 清敏公與權字悅道嘉定間三爲府尹盡力民事都人稱曰趙佛子久之升大學士薦士六十人詳見城北賜府下 宗正少卿逢龍字應甫爲學淹博純實家居講道四方從遊者皆爲鉅公爲政務寬恕一以天理民彝爲言民是以不忍欺居官自常俸外一介不取官至宗正少卿兼侍講卒於家 以勲業著者待制粹中字叔達孝宗朝一歲九遷由秘書郎至吏部侍郎奏對常言防邊疏罷王安石父子從祀乞正雪岳飛冤狀又集司馬光范鎮等奏議正太祖東向之位寧宗卽位卒如其議後以待制知池州郡政修舉民生祀之子遵隱於茅山 知岳州善待字時舉初官市舶務未嘗私買一物高麗之至者一

四明談助

卷二十五

十

艘明年六七焉知岳州時江西旱奏禁苗錢孝宗嘉納以征稅忤湘南帥罷還主管冲祐觀四子汝述汝達汝遇汝适繼踵登科人以爲榮俱見絜齋集

邱提學第

在郡廟西邵提學玉王子莊刑部郎城傳見鑄冶坊邵氏下

握蘭坊

西南廂交界新橋東

寶慶志

宋宗室天水郡公善湘所居也

聞志

皇親宮

南渡後賜居英宗高皇后之族據寶慶志圖新橋東十字街口南爲清潤坊皇親宮在清潤坊之南今建定香菴處聞志誤以清潤爲清瀾謂在譙樓前以未見寶慶志第一本故也

新寺後巷第四

今稱沙井巷東達新排橋有華檢討宅東北達新街西抵漁欄橋達握蘭橋有重桂坊孫氏項觀察第握蘭廟等蹟

華檢討宅

甬上族望表嘿農華氏殉難檢討夏一望

元孝子華昭

鄞人生未晬而父亡母沈氏家貧不能自存父母欲奪其志誓死弗許勤紡績以教育其子後疾亟旁無侍給惟昭在左右昭雖幼能割股以救親病乃愈後沈氏七十七而卒昭亦能卓立爲鄉人所重温州路總管劉仁本爲之傳

稱其節孝萃于一門云

志成化

四明談助

卷二十五

十一

鄉長者華公明義

字魯卿號渭南始居定海從兄萬歷間進士工部主事顏上理財裕餉二疏有裨國計典試閩中卒公遷於鄞孝友仁厚事親必盡其誠訓子嵩補諸生從子夏誨養尤篤處以南樓午夜聞呶唔聲必欣然自起慰以茗果由是無書不讀名馳四方與倪鴻寶黃石齋兩先生氣孚聲合皆渭南有以成之也

詳聞志

殉節檢討華公夏

字吉甫別字嘿農少與同里王公家勤齊名同受知於新城黃公端伯華亭陳公子龍浙東社盟所稱華王二子者也乙酉六月浙東兵起首與董公志寧倡大議預于六狂

生之目其奉錢忠介公書入定海說王之仁使返旆幾陷虎穴夫己氏欲殺之而不克詳見忠介神道碑已而論倡義功授兵部職方主事兼翰林院檢討皆不受請以布衣從軍悍帥秉成諸經畧皆不用然猶與陳太僕潛夫出戰牛頭灣彈從頭上過如雨不退檢討雅素勁挺忠介亦不能盡與之合遂謝去是爲乙酉之仲冬又七月而江上潰是時浙東未下者祇翁洲彈丸地顧浙東之學士大夫以至軍民尚惓惓故國山寨四起皆以恢復爲辭檢討謂人心未去也而錢忠介公航海入閩連下三十餘城閩人告急於浙浙抽兵應之浙之守備稍虛檢討曰此可乘之會矣謀之益急丁亥乞師翁洲翁之故總兵黃斌卿無遠畧

猶豫不應檢討憤責而歸未逾時慈之大俠以馮侍御京第海上往復書洩牽連檢討捕之入獄或曰亦夫己氏所爲也家勤與董公德欽悉力救出之檢討不以爲懲謁李侍御長祥於東山侍御曰吾於會稽諸城俱有腹心一鼓可集但欲得海師以鼓動聲勢子其強爲我行乃令楊公文琦往時馮侍御京第方在翁洲力勸斌鄉楊公曰爾失期事且壞今十一月四日直指使者之天台監司而下皆送於南渡可乘虛至也我當約諸道畢集以待將軍之樓船東山之兵亦以是日入越斌卿曰諾自檢討偕王楊諸公經營恢復事東西連絡飛書發使日無寧晷以爲功有緒矣而夫己氏廣行賄賂遂得反間之力中途賺取檢討

所貽大闌帛書盡得其詳由分守道陳謨以告之直指秦世楨直指乃詭期不出而密調慈水之兵以襲大闌定海之兵以勦管江姚江之兵以搗東山三道之兵皆潰急捕檢討得之屆期翁洲入關直抵鄞城東之三江口諸道兵無一至者屠駕部獻宸約以城中海道麾下陳天寵仲謀二營之師爲內應至是海道孫枝秀嚴警陳仲二將軍不敢發斌卿知有備亦不敢攻而去直指乃令知府大陳刑具訊檢討究其黨與檢討乃慷慨獨承曰心腹腎腸肝膽吾同謀也及問帛書所載楊王屠董諸人皆言其不預知府再拷之檢討大呼曰太祖高皇帝造謀烈皇帝主兵安皇帝司餉其餘甲申乙酉殉節諸忠范公景文史公可法

而下皆同謀也知府三拷之皆不屈而是日也謝昌元亦爲人所告下獄初謝氏欲害五君子以求用於新朝不料枝秀之艷其富也欲并殺之而取其室乃使人上書告之又使人密語檢討曰謝氏汝冤家可力引之當爲汝報仇及共訊檢討曰咄嗟此乃反面易行首先送欸之人也而謂其不忘故國吾死不瞑矣謝跪搏頰謝曰長者長者檢討在獄中鼓琴賦詩如平日自稱過宜居士絕命時有白光一縷冲天而去生平著述最多亂後散佚僅存過宜言八卷其獄中所訂摻縵安紘譜泗水鼎樂府對簿錄藏於高武部隱學家今惟對簿錄尚有存者

結埼亭集外編

勾餘土音擬薤露詞

泗水鼎 華職方對簿

詩話職方獄中自著對簿錄述蒙難事甚詳職方精於音律獄中尚手訂太常摻縵安絃譜不知其後流落何所泗水鼎亦獄中所著樂府述蒙難事

九鼎沉泗水萬夫不可援奈何以孤掌徒自取喪元幸逃武寧刃終飽肅鹵拳猶復不可止踊躍入重淵降臣耽耽視告密飛章傳請披對簿錄慷慨不受憐一曲泗水鼎五絲廣陵絃上宮驚朱鳥下宮來啼鵲

華烈婦盡孝保孤

華檢討夫人陸氏有雋才而性貞且孝檢討正命有令徙諸家妻子於燕檢討之友高文學斗魁急過語曰夫人當

四明談助

卷二十五

十四

自爲計夫人曰諾次晨起視其盎中有米親操臼舂之舂畢跪於姑前曰嬪不隨郎去恐終不得事姑也姑其強飯自愛以保天年語畢其姑哭夫人亦哭隣里聞者聚觀如堵墻皆失聲哭夫人徐起投繯堂中旣上而絕者再時方盛暑汗涔涔下隣人或以楊梅一盂進曰願夫人嘗此而後死夫人亦渴甚啖之盡以巾拭汗復易繯而殞而檢討次子凜咫夫人於前數日密託檢討之友林評事時躍竊出匿之僅以瘴聞其家莫有知者其後凜咫竟育於林氏年二十始復姓詳見林評事阡表

結埼亭集外編

勾餘土音擬薤露詞

白石杵 華烈婦舂米

詩話華夫人於職方正命後爲養身以奉姑會聞家屬
將北徙夫人春米數斗與姑投繯畢命有絕命詞
郎以扶義死妾敢忍辱生豈不念老姑懼玷妾苦貞欲死
旋復止老姑雙淚零妾今隨郎去老姑長煢煢晨羞與夕
膳誰其爲經營何以展妾意殷粟尚盈盈勉持白石杵爲
謀鑿與精妾已早絕粒臂力枯不勝皜衣汗浹背哭聲和
登登老姑鑒妾意加餐日一升妾今隨郎去夢中還來寧

漁欄橋

平橋河一自握蘭橋北側東入漁欄橋土音訛漁爲吳故亦
呼吳欄橋舊通新寺後今悉入民家不可復問矣敬止錄有大
石柱臥於橋旁傳聞全萬二家建坊相讓棄其石於此

四明談助

卷二十五

十五

握蘭橋誌石

元至元二十七年城中握蘭橋旁民家築室穿土得誌石一
片其文乃唐開成四年太原王夫之墓誌謂其曾祖王元浩
在元宗時拜諫議大夫左庶子慕巢由之志辭疾不就宋尚
書王應麟爲詩以紀其事聞志

鴻濛肇開闢變嬗幾成毀寥寥斷竹歌瓦墜荆姚姒周墳典
以族詎認青烏子公琴紀咎絲邢山稱東里葛消失之矯璠
璵過于侈焉知宮夾墓莫識龜言水銅槃字十六銘自比干
始延陵有孔篆烏寧半辭止漢磚猶簡樸石章寢華靡無愧
惟有道媚俗多虛美七松諛士良何以懲不軌載筆鮮南董
襲浮謬臧否豈悟冢中人三百年不死婦名弗出梱古未有

碑誄謚見春秋初誌起典午氏簪蒿隱士妻芳刻垂千祀楊
高託不朽習之文中理或犯葵邱禁息國事何恥蛾眉爲黃
土磨滅更誰紀宰如比何人雒邑之士女逸民儒仲裔冰雪
濯紈綺來儷古鄆州儉勤終莫齒試問幾何年頗與銅人似
雖微黃絹辭亦質而不俚邱夷池又平蓬顆令墨市聚廬寒
劫灰餘光輝泥滓曰德曰□儔閨□萊鴻比我行松柏下勢
榮朝茵爾隆碣牛礪角翁仲臥荆杞蘭艾均二塵玉珉同一
燬孤竹夢茫然柳下壟孰是片石幸有傳詩以貽彤史

重桂坊孫氏

謝山謂太常世居江東但重桂坊據寶慶志在新寺後

甬上前族望表重桂坊孫氏太常起予之後也其父枝爲一

四明談助

卷二十五

十六

望太常爲一望山長元蒙爲一望

孫徵士枝

字吉甫父允自定海徙鄞從鄉先生沈銖學學以真實爲
本教授鄉校者十年徵士與沈先生之子端憲亦相友善
又登朱晦翁之門學問益精粹嘉定七年與子起予同登
進士第允尚無恙鄉人榮之徵士卓邁有智畧自秦隴荆
襄達於淮海凡險要阨塞若指諸掌於軍事邊謀尤練習
淮帥延諸幕府以祿不及親辭不就

至正續志

孫太常起予

徵士枝之長子初爲昭武參軍郡卒諫於庭太常往諭之
卒羅拜曰孫司戶清廉官不得犯入朝爲監察御史至太

常少卿弟願質紹定五年進士第終工部侍郎願質子璫
知臨海縣奉母在官元兵至母子俱蹈難死至正續志

孫山長元蒙

字正甫徵士枝之後也少孤姿性穎異鄉先生魯月卿精
於毛詩公潛心請業遂盡通諸家之說僉帥董搏霄辟爲
餘杭教諭既至值兵甲之餘絃誦絕響公日講明忠孝大
義聞者興起在任二考調松江忠清書院山長慨然曰吾
何仕哉得爲晚節完人可矣歸隱於家滎陽外史集
句餘土音孫太常重桂坊

詩話太常世居東臯或謂其居翁洲者固謬卽謂居鄞
之日湖者亦謬

四明談助

卷二十五

十七

吉甫少游學朱沈互討論頗疑晚所得永康爲最近慷慨
王羈圖風馳而雨震秦隴暨江淮置掌不可溷斯人良有
用未得都堂進祇緣不逮親投簪志長恨太常好兄弟連
枝發秋信天香遍東臯家學爲中奮世德歸山長謂杜洲山長元
蒙儒林有玉振翹首望東臯誰其嗣令聞

項觀察第

漁欄橋巷內有項氏宗祠相傳爲項觀察舊宅

項觀察良梓字鄧林萬歷三十八年進士授刑部主事奉命
恤囚山東遼左屢平反疑獄擢永平知府值軍儒旁午殫
力以應事皆集遂爲北平保障晉昌平兵備副使陵軍多
虛額守陵內官乾沒其餉副使請覆之爲璫所構罷歸曹志

孫培康熙四十七年舉人

重桂坊

新寺後巷口嘉定七年攝守程覃爲孫枝與子起予同第立

寶慶志 有廟祀境土之神以廟南坊名握蘭卽以名廟聞志

新街第五

東達洗馬橋西達廣濟橋有崇讓里全侍郎第萬都督府新街徐氏等蹟

崇讓里

鮎埼亭集記畧前明都督同知鹿園萬公以大將有功於倭亂而爲理學名臣其論漕事尤切中治道蓋古今儒將第一流也都督第在城中新街實與先侍郎居毗連鳴珂之里文

四明談助

卷二十五

十八

武鼎盛而以講學尤相睦都督已登五府養疴杭之西溪先侍郎亦官至院長時有部使者都督樹坊於街之兩偏其西曰都督衙其東曰錦衣里成有日矣適有自京師至者曰全學士以不肯撰青詞改南院矣南院一席本應慈谿袁學士往袁自請留撰文而全代之南都督瞿然起曰有是哉學士之大節如此耶乃言於部使者願以東方讓之部使者以書來告先侍郎曰此當道爲萬君旌功也鵲巢而鳩居吾弗敢也亟爲書以讓都督而都督曰吾已言之矣此亦粉榆之佳話也先侍郎終固辭不敢受而都督亦遂并虛其西坊不果上至今此兩坊者有雙闕巍然而無橫石不知者或以爲歲久而圯也因議以崇讓名其里而爲之記

全侍郎第

全氏始祖宋御史知青州府權自江左遷鄆之桓溪沙港口
至十六世伍瑜復自桓溪分居鄆城新街以孫貴建侍郎
第

全贈公伍瑜字廷美號慎齋以孫元立貴贈文林郎

全學博良政字本仁號南川嘉靖三年歲貢官蘇州常熟教
諭以子元立貴封徵仕郎翰林院檢討

少司空全公元立學博良政次子官南京工部右侍郎子四
少愚少成少懷少微少懷無出

全宗人少愚字學甫少司空長子攷授宗人府玉牒儒官

全都事少成少司空次子諸生補監生授江西布政司都事

四明談助

卷二十五

十九

以子天叙貴封贈女一適聞莊簡公

全和陽少微少司空四子諸生補監生授和陽同知

少詹事全公天叙都事少成次子官詹事府少卿贈禮部右
侍郎配楊碧川尚書之孫女

全應山天授和陽公少微次子萬歷二十三年舉人授湖廣
得安府應山知縣子大和大利大程

全舍人大訓少詹事長子官中書舍人子美柟美樟少詹事
次子大震人稱非堂先生子侍御美閑

全徵士大和號他山應山天授長子以大程子美騏爲後
全贈公美騏號北空大程子爲大和後北空子宗書諸生以

子祖望貴贈如其官

以上傳見湖西新第下

勾餘土音詠祖居故蹟

魏笏亭

詩話先侍郎在詞館不肯為肅皇帝草青詞慈谿袁文榮
煒願代其任侍郎遂請改官南京以便養母

西內詞臣貴青詞手板排中流存一柱敝屣薄三台鄉袞欣
承乏斑衣戀陟陔至今牙笏在正氣滿蓬萊

崇讓里

詩話先侍郎與萬都督鹿園為隣交讓建坊時人呼為崇
讓里

靈光聳故闕王謝兩高門交讓連枝秀百年薄俗敦先型懷
大老世好結文孫莫替林泉社清風尚有存侍郎孫宮詹再

四明談助

卷二十五

二十

訂林泉
之會

歸鶴莊

詩話先和州少微最孝建是莊以廬墓垂老尚戀戀焉

耆年猶孺慕誰似蕙洲翁白鶴終難返慈烏尚負恫先朝霜
露感丙舍蓼莪叢手澤蟪蛄額蒼雲世鬱葱先侍郎題蟪蛄
神額和州自江

上奉
歸

思舊館

詩話先贈公吾驥築思舊館於管江以懷王石雁施仲吳也
石雁來管江先過贈公一飯而去次日被執死之

稽呂良堪悼山陽是管江壘猶稱復楚路已斷窮龐一飯難
為別寸心不可降淒涼亡國恨谿澗水淙淙

萬都督府

萬氏三世四忠傳已詳鑿橋賜第下至八世表官都督建第於新街四忠之下傳見後

萬指揮全

字惟一射龍將軍文之遺腹子也年十六襲指揮職天性
和易孝順正統間嘗從大帥討平閩括盜不居其功子
禧字天祥天順中襲職 禧子椿字有年宏治中襲職

詳見

曹志

萬都督鹿園先生表

字民望指揮椿之子痛父早世事母篤孝中正德十五年
武會試嘉靖初充漕運總兵官于國計詘贏河溝通塞靡

四明談助

卷二十五

二十一

不曉暢欲開河北山東圻內一帶荒田重農薄賦爲漸減
歲漕之地識者躉之海上倭亂起公散家財募死士并選
少林僧兵戰于翁家港大敗之時賊據內地久民不得田
公言于巡撫蠲逋弛力懸賞格以招之內地稍甦而賊又
蜂屯諸島歛汪直者以驍勇魁其曹公策其可誘致也薦
同邑蔣洲使爲間未及行而公卒後總督胡宗憲卒遣洲
以致直實公所謀也公將家子通經術熟先朝典故諸凡
辨論皆本躬行心得歷官四十年可稱古來儒將

詳見明史稿

萬叅將達甫

字仲章幼與庶兄謙甫讀書溪橋上每盡一卷輒投溪流
覆誦不失一字受業龍溪荆川之門造詣純篤居父喪哀

毀踰節已棄諸生襲職歷官廣州叅將謙甫以選貢任江西萬年簿從弟廉甫讀書能詩文居錢唐以明經終曹志

新街徐氏

族望表未指其實但云諸生明節一望後又云別有太常卿應奎御史金星之族以此時里居世系未經考實故闕而不定御史與太常同族未可知而諸生明節實係太常之孫且居在東上橋見於竹湖林氏譜

徐御史金星

字紫庭嘉靖四十年舉於鄉令池州府之建德以治稱召入爲御史時舉人行取無得召入爲臺省公獨從異數掌

河南道遷按察僉事致仕聞志

四明談助

卷二十五

二十二

徐太常應奎

居東上橋傳附此

字見吾隆慶二年進士授刑部主事歷陞河南叅政已改廣東轄珠池輿論翕然稱其廉明遷福建右布政舊有羨金三萬充私橐公一無所取調廣東左布政四疏乞歸加太常卿致仕詳見曹志孫明節諸生謝山族望表稱爲一望事蹟無考

徐監軍美節

字松盟太常之孫林御史時對妹壻也常在御史中軍

續耆

舊傳

大梁街第六

東有萬壽坊達泰和橋西達廣慧橋有萬壽寺有邑廟前通

郁家巷有古司戶廳有徐氏宅左氏宅郁家廟等蹟

萬壽禪寺

唐咸通十三年使君周景遇捨廡宇以建賜額惠燈宋太平興國七年改額崇壽政和八年改額廣慧建炎燬於兵後重建嘉定十三年再燬重建或謂慧字從慧從心于星皆火讖爲額不利郡聞于朝紹定元年賜改萬壽額是時東北廂火環寺皆延燎而寺獨存人咸異之元至正十九年燬至大二年又燬住持子文復建後圯明永樂三年延海會寺子顓住持重建方丈復建大殿塑佛像并建山門廊廡大司成陳敬宗有記 國朝康熙間惠光寺僧遂明捨山九十六畝聞嘉慶十七年住持坤和改建大殿山門重塑佛像至道光四年

四明談助

卷二十五

二十三

落成

開法大師清濬

字天淵台之黃巖人古鼎銘入室弟子也開法於鄞之萬壽退隱東湖二靈山之青雷峯洪武四年設普度大會于鍾山召濬高僧之列引見太祖勞問甚至錫賚而還九靈戴良撰二靈山房記借山水之奇以證其學年六十五留

偈而化

詳聞志

單徵士居第

鄞人單仲友居萬壽寺西能詩洪武中徵至南京獻詩稱旨因奏本府名同國號請改之因改明州曰寧波府時洪武十四年賜仲友還鄉考終于家聞中今古錄 仲友名佑以字行嘗至

象山僧舍有僧石法衡者有聲叢林間單問如何是芥子納須彌衡曰先生讀五車書今安在何處單甚駭敬錄敬止

李侍郎第

在大梁街工部侍郎李堂所居聞志相傳今邑廟即其府基

縣城隍廟

鄞邑附府故行禮亦附於府城隍寶慶志元明皆未立 國朝

乾隆三十四年始建於縣南大梁街錢志

郁家巷 司戶廳

郁家巷古有司戶廳故又名司巷永樂志曹官助理郡政有錄

事司戶司理司法各參軍司戶廳掌戶籍賦稅倉庫受納舊

廳事與萬壽寺相對嘉定十三年火重建紹定元年守胡榘

四明談助 卷二十五

二十四

重修寶慶志

司巷徐氏

徐戶部家麟

字石客一字蒼郊其先本慈溪人徙鄞登崇禎癸未進士

江上授戶部主事丙戌而後蕉萃窮愁戶部飲酒素稱大

戶遂與舊交董天鑑日為沉湎之役晨夕過從少醒多醉

錢蟄菴朱柳堂皆其伴侶也所著頤閣集四卷詳續者舊傳

徐御史劾

字道勇戶部家麟之子中康熙三年進士授三原令值吳

三桂作逆四川平涼皆叛應之秦中郡縣供應驛騷公區

處井然再任廣東順德令嘗行部見室多停柩野有暴骨

飭令歸土無主者捐俸葬之民頌其仁秩滿擢御史卒見詳

曹志

徐學博本禮

字秉之御史勅之孫乾隆癸酉拔貢授分水教諭僻處山中甘于澹泊與諸生教學不倦孫受荃字楚香嘉慶辛酉拔貢丁卯順天舉人官兵部郎道光五年歷陞江南蕪湖道旋丁內艱回里

左提學第

徐戶部宅之右回祿後徙居王家墩謝御史第前

左教諭臣黃

字紀雲號江樵先世自萊陽居鄞代饒陰德父應斗爲學

四明談助

卷二十五

二十五

在己不事浮博生平著述皆從心性實地上發揮傳見此

聞志

先生之家學也 國初吾鄉諸老先生以古文有盛名於天下者莫如姜編修湛園次之爲萬五河管村而先生古文更出其上顧湛園管村皆遊京洛並參明史館務而先生落落穆穆不求人知其氣力無由達于朝宁亦遂無有物色之者見人口吃爲人疏散任本色嘗以周徵君鄧山未謝酬應累諷之一日諧之曰商容受寧王表閭之寵赴謝鎬京道逢伯夷勸其改姓信有之乎徵君笑而謝之然不以爲忤也其後徵君之子宛善深以此言爲憾要之徵君大節終不愧于遺民而先生不失爲諍友並可傳也老而得舉于鄉北應計車仇侍郎滄柱在闈索先生文甚苦

及折卷乃知先生文固在本房歎曰平生浪說古戰場此之謂耶晚授錢塘教諭弟峴任廣東學使有貲甚侈先生不肯一分潤也所著有江樵集藏于家結埼亭集外編續耆舊傳云先生爲人倔強故同社怡庭諸公講經于梨洲而先生不豫秋水諸公詩會近在門巷而先生亦不豫然而博學高文則實一時之希也遺集甚富今所存者粵風四卷惕崖近咏四卷而已

左提學峴

字襄南又字我菴父應斗有學行以貢授平陽訓導辭不赴先生中康熙九年進士由工部出爲廣東提學試竣歸里先生讀書樸實有根抵尤嗜經學其宋元抄本手自校

四明談助

卷二十五

二十六

者一百數十種今世所傳崑山徐尚書通志堂經解類皆

先生書架中物也

詳續耆舊傳

郁家廟

司巷內郁家廟侍郎全元立改名毓嘉廟聞志

古人有立廟以祀其園神者如蔣家廟楊家廟之類亦有公祀五行或六府之神而或亦以某家名者不外獨立創社或首創立社之家不妨名仍其舊乃郁家改爲毓嘉自全侍郎始未幾而楊家改爲揚嘉蔣家改爲獎嘉柴家廟改爲聚奎廟而且署其名于額曰華學成題甚至戚家橋之戚家廟成化志名猶仍舊不知何日改曰嘉佑而且稱龐公之神以實之誠不可解

小梁街第七

東有阜財坊達右營衙橋西達柴家橋中有宋三廳一營又有明謝御史第徐御史第今右營署開明菴開明山等蹟

司法廳 宋應唐制掌議法斷刑大觀二年改議刑參軍

監倉廳 監府倉米錢出納制帥交承登載帳冊上其數于朝一歲兩申

製幹廳 熙寧六年詔作院分造軍器靖康間物多不脩令提刑司專一管幹轉運司應副材料

牢城營 紹興間汰老病軍員充牢城指揮後以名稱未當改為寧節指揮營東南廂俱詳見寶慶志小梁街街北有牢城營巷通

開明橋小街營在巷內

四明談助 卷二十五

柴家廟巷謝氏

薛千仞鄞獻表云柴家廟巷謝氏謝瑾永樂丙戌進士按察使謝汝儀

正德甲戌進士按察使謝汝誠嘉靖庚子舉人知州謝簡崇禎辛未進士

福建順昌令趙彌昌孫宜璧之女適小梁街謝御史公子嘉靖庚子科舉人汝誠見君子營趙氏宗譜則知鄞獻表所稱

柴家廟巷謝氏實河東小梁街謝氏也旗杆夾數對尚在想當日謝氏子孫歸於徐氏徐氏再歸于右營水師作公署

按察使謝公瑾

字廷蘭其先蜀人徙家于鄞登永樂四年進士出使廣東道經庾嶺見大木委於道旁作悼木賦以見志尚書夏原吉見而奇之薦授刑部員外郎歷陞廣西按察使多所平

反兵民畏服長于詩文著蝸濡集

詳志成

至行謝先生矩

字元規父思恭生二子長員字友規次卽先生兄弟俱有文名員以諸生充臬掾後謫戍臨洮及涼州先生常裹糧以從後遣員家屬赴戍所力請與偕抵吳門父卒旅殯之而與嫂姪至京師適家屬放還乃迎父櫬歸次年兄沒戍所又間關數千里負其骨歸撫諸姪益至里人高其行名所居曰孝義堂

詳見者舊傳

水東日記云員善爲文有鳴窮集

時待詔潘若水學士解大紳亦謫衛吏有吏中三傑之稱員作有與速魯麻序別文一首尤古雅有致

按察使謝公汝儀

四明談助

卷二十五

二十八

字國正元規曾孫正德九年進士授餘干知縣時中貴監茶稅聲勢薰灼公持之不少阿迄不得肆其暴擢監察御史直聲大著上疏乞寬假議禮諸臣請誅巨璫谷大用等首觸忌諱人爲廩廩尋陞雲南叅政遷江西按察使比死家貧不能償宿逋

詳嘉靖志

徐御史第

徐氏舊居在天童街自明季遷居城東之小梁街而天童街之香眉閣等業仍在甬上族望表太白徐氏御史待一望

徐御史待

字子器父節嘉靖十年貢士官教授公登萬歷二年進士擢監察御史條奏實議五事縷縷千餘言皆切時弊遷江

西按察僉事卒于官性儉素嘗出按陝西道經河上輓芻卒從舵樓窺之見一羊裘蒙茸者疑非眞御史叩其從人始駭歎孫承烈由舉人官刑部主事

詳邱志

徐都御史殿臣

原名之墀至省試始改今名字心水刑部郎承烈之子崇禎七年進士以行人擢試御史初舉禮部出黃漳浦道周門下漳浦以疏諫楊武陵奪情大拜得罪先生賦詩有如公眞不欺明主在帝何曾殺諫官之句當軸側日出提督南京學政左遷山東僉事以親老乞歸國變後南京繼陷破家輸餉已而奉父避亂入山爲海師縛去索萬金以友人周鄮山救免已而又以故國遺臣被羈于杭久之悒悒

四明談助

卷二十五

二十九

成疾卒喜讀白蘓二公詩顏其閣曰香眉

續者舊傳

徐開封懋昭

字晉公其父承烈亦能詩公少貧工詩成康熙甲辰進士知沛縣沛有前孝廉閻爾梅志士也時方亡命山海之間刊章名捕開封外奉簡書而陰厚其家已而爾梅以合肥龔氏之力得釋生還開封繼粟繼肉待之極恭時人以爲難己未薦舉鴻博報罷同知開封府生平最持資格素與徐戶部家麟有兄弟稱已而戶部子勅同甲辰榜欲以齊年相視開封遂絕往還其剛如此著澹園詩集

續者舊傳

開明菴

縣治東開明坊下唐大歷間移鄮縣於此遂有此菴歷宋元

明屢加修復 國朝明觀真旨如嘉先後重葺聞志臨街有關
聖殿匾額周鄧山所書

開明山

萬歷三十二年開明橋余鶴卿家起火沿燒四街鶴卿閉門
焚死搶火者八十餘人自後白日鬼號行人畏阻儀部屠隆
因於其處集僧衆大行法事鬼乃絕曹志余相國後人諸生仲
年說鶴鄉係相國之孫于開明橋開當舖家道日隆火變之
後家盡落作事皆不順就中不無果報當日沿燒家將瓦礫
泥沙運積于此日久成山俗稱開明山